

皇明兩朝疏抄

皇明兩朝疏抄卷之九

時政類

陳愚惇少裨 聖落疏

霍韜

臣伏觀 聖旨有關國事大計各自陳說來行欽此臣竊  
見近年凡遇災變只煩 聖主憂念而已無有能長治久  
安之策為 社稷任其憂者也豈諸臣皆無識者耶抑亦  
為身謀不為 國謀也臣於嘉靖元年曾進三劄嘉靖七  
年又錄奏疏二帙仰懇 聖覽矣竊念臣之愚見極是粗  
淺惟一念愚衷實欲為 朝廷革盡積弊立 宗社千萬  
世無涯之基心有餘而力不足也臣今再錄嘉靖第二劄

仰塵 聖覽如蒙日月之照察臣之言 召各官詳議萬  
一少有補焉臣愚幸甚蓋臣學識止此故十數年獻上愚  
計亦不過此伏惟 聖明俯賜採納臣不勝幸甚

錄進嘉靖第二劄臣聞漢文帝入蒞大統首問每歲決獄  
幾何每歲錢穀出入幾何陳平對曰一有主者司馬光謂  
平所對為非非也或又有云文帝非宜問亦非也蓋知刑  
獄之數可以知風化矣知錢穀之數可以知經費矣此文  
帝之問實人君初政之首務也臣願 陛下即此問推廣  
可乎如蒙首詔戶部問之曰 祖宗朝歲計賦稅所入幾  
何各省存留幾何內府軍需費幾何百官廩祿幾何軍士糧

餉幾何三邊供億幾何 藩封祿米幾何內官月糧幾何  
較之今日歲計所增幾何所減幾何然後從而思之曰賦  
稅所入猶夫昔也所費所出不有倍於昔者乎年代愈深  
流弊愈極盍有以處之乎次 召吏部問之曰 祖宗朝  
外任百官幾何京任百官幾何薦舉幾何科貢幾何雜流  
幾何較之今日冗員所增幾何衙門添設幾何然後從而  
思之曰興圖政事猶夫昔也冗員冗食不有加於昔者乎  
官添弊冗政紛多門盍有以處之乎次 召兵部問之曰  
祖宗朝天下軍職幾何京衛帶俸幾何外衛帶俸幾何天  
下軍士幾何在京軍士幾何校尉幾何較之今日所增幾

何所減幾何虛名無實勢要包辦月糧幾何然後從而思  
之曰天下疆圉猶夫昔也冗員冗兵不有倍於昔者乎愈  
久愈冗愈冗愈極糧食無措豈有以處之乎次召禮部  
問之曰祖宗朝天下親藩幾何鎮國奉國將軍中尉  
幾何儀賓幾何內官幾何較之今日所增幾何所減幾何  
然後從而思之曰歲計賦入猶夫昔也宗藩內宦有不  
倍於昔者乎勢窮則變變則通通則久豈有以處之乎次  
召工部問之曰祖宗朝歲計物料所入幾何恒年修理  
幾何工匠幾何柴炭幾何較之今日所增幾何所減幾何  
然後從而思之曰天下課料猶夫昔也浮費不經不有倍

於昔者乎繁費日滋帑藏日竭天下日困 國計日艱益  
有以處之乎次 召刑部問之曰 祖宗朝歲決大辟幾  
何較之今日天下決大辟幾何情真着監幾何可疑見監  
幾何然後從而思之曰好生惡死人心猶夫昔也嗜利忘  
死有不倍于昔者乎經秦處決有此數也敲推冤死不有  
万於此者乎民無恒死斯無恒心刑酷民冤 國體攸繫  
蓋有以處之乎是故天下一大家也處天下猶夫處家也  
今天千金之家一人享之其百費饒洽也固宜再世再有  
五人焉則為二百金之家矣則二百金之家復圖千金之  
費不日就窮促已乎雖然二百金之家儉以圖存其不墜

先業也亦宜再世再有五人焉則為四十金之家矣以四  
卜金之家復圖千金之費不立墜先業已乎然雖四十金  
之家猶可擴之為二百金之家也二百金之家猶可擴之  
為千金之家也存乎人者也天下一大家也不再擴焉者  
限於勢者也我 祖宗創業之初猶夫億萬金之家也

宗藩之分封猶夫子孫也百官猶夫工作也內臣猶夫戒  
獲也軍士猶夫守家之大也歲費供億猶夫家之調度也  
率是數者皆如 祖宗之舊猶勢窮弊生尚宜思所以救  
夫末流之患以適夫時宜之制柰之何年積月冗於是數  
者不知幾倍於 祖宗之舊浮費日出日益日甚不知幾

倍於祖宗之舊是猶承千金之後者不知其已落二十金之家矣復妄意夫千金之費也若之何其不窮乎

陛下思而及此尚早圖之由內臣外臣協心同憂兢業十年乃克有濟失今不圖後無及矣今縱未大更張陛下只時念及此或命六部開具大數揭帖朝夕觀覽則所以恐懼樽節之思自不能已矣內臣勲戚亦使之憂勤惕厲以防夫日後之患以舒夫目前之急國家得宏父大之圖內臣亦享綿長之福陛下日慎一日心由此正慾由此窒天理常存邪佞退聽克已復禮之力由此益堅祈天永命之道由此馴致潛消默運之中自致夫聖德神



功之感矣天下幸甚萬世幸甚

條獻末議以裨 聖政疏

陳以勤

臣惟方今治道休明 朝廷清肅百凡執事咸碩竭智盡  
能總總焉懼蹈於曠職之罪況乎公卿大臣祿位崇厚責  
任異於他人若但憑藉寵榮優游日月既不能畢力以興  
設便宜又不能矢謨以翼宣 神智其為曠職孰甚焉臣  
備員密勿幾及四年幸逢 皇上恭己圖治虛心任人凡  
機務之繁悉委裁於 內閣臣得隨諸臣後竊見 國家  
大體時用之宜已多謀求而措於行間有一二因循不飭  
者臣頗潛究其畧區區之懷不自揣量亦思與諸臣漸次  
舉之顧臣年來多病氣血衰殘理當乞身恐不能待即欲

緘默無復一言而去則上負恩遇下垂素心律以人臣  
圖報之義豈能無愧謹晝夜度條為六事或稽諸方冊  
所載或參以衆多之言實於治體有關不但虛文塞責而  
已伏乞 聖明加惠垂覽 勅下該部早 賜施行臣不  
勝大願 一慎擢用臣惟爵祿者天下之砥石聖王所以  
厲世磨鈍恃有此具而已故其低昂之際不可不慎也臣  
竊觀近年以來 朝廷所貴重而擢之最優者豈非吏部  
司屬與科道耶蓋諸部司屬計俸躡級必在再歲時廼得  
為而司知府等官而此三衙門有數月逾朞即驟陞者然  
且謂為外也多愷愷不得志以去若京堂員缺則此三衙

門宦需次而貴而進其餘固不及矣夫京堂著部院之儲  
品格崇峻廼今可以計日月拱手得之臣故曰朝廷所  
貴重者莫如吏部科道也然所以貴重之者非徒以其資  
地而已誠以其人也臣考前志稱吏部即宜得整風俗理  
人倫者而臺諫之選尤稱華要往往名卿碩輔由此焉出  
今制每遇三衙門乏人則於內外相應官員慎簡以充其  
餘廼受諸部寺屬至諸部寺領有賢聲者又羅而致之三  
衙門中是三衙門者所拔於諸司之秀也其擢之最優蓋  
即古者超遷以待俊才之意又非不善也所可議者第一  
以俊才待之而或不盡得其賞耳即以臣歷官所親記其

出自三衙門者固多以英碩致身樞要然緣速化而招物  
議者蓋亦不少亦有始焉蒙被殊擢及臨事任以為不副  
而姑置焉者夫此一人也既以才美而進之旋以趨競而  
斥之且不靳殊擢於前而復難其任使於後其故何耶蓋  
由于識拔之不精而所養者不必皆所用也方諸臣之膺  
是任也多自謂高華可蠟至惟思累日以取貴積久以待  
遷而司銓柄者亦但紀錄年勞量為陞轉其稱職與否有  
不暇盡論者焉此套相襲視為故常數十年來未之有改  
至如科中內外簡陞一節尤為亡謂夫使其當留也雖數  
十人連陞京堂而非濫其不當留也雖數十人連陞外寮

而非屈今顧以定法繩之殆非為官擇人之意也書曰明王立政不惟其官惟其人若今之優擢此三衙門者豈盡所謂其人者哉陸贄有言居常則寵遇太厚有急則備位不充如此則何以厭服諸臣之心而使無積薪之歎乎今欲曠然一矯前弊莫若畧去資地止論才望不以累日積久為賢能惟以任官稱職為差等此後遇三衙門有缺既擇人以處之又必時時探其行能閱其議論其優游循默低迴庸眾間者亦只照常推補不必過為旌別惟察其方正修繁有宏猷遠識將來可以勝大事者乃留為四司郎中給事中及京畿提學巡按御史候京堂員缺簡而用之所

任愈重則所擇愈精然後尋常尺寸之才不得爭馳競進而澄汰之後斌斌乎皆天下之選矣以此而膺不次之恩居顯顯之任畀之者無異議居之者無愧容且令國家常得真才而使之豈不盛哉至於諸部寺屬其間多有志行偉然在本衙門稱為特出及南京科道各省藩臬中亦有令聞嘉績人所共推轂者合無一體蒐訪遇京堂缺每歲間擢數人庶幾內外賢才羅網不遺百司庶府孰不踴躍自奮求無負于明時而官人之典亦公平正大不致有所偏重矣是誠新美治道之一助也伏乞聖裁一酌又任臣惟久任之法其來已久遠在今日凡內外臣工均

宜倣而行之而施於郡縣守令尤為至切蓋守令替纓民  
之官其職專其務劇不可倉卒而效功者也今之仕者各  
媮為一切因循覲遷孰肯盡心於政教科指為數世利者  
故每視官職如傳舍視其民如胡越循良善治卒不可復  
勢使然也左雄謂吏數變易則下不安業久于其事則民  
服教化以臣觀之實為至論蓋自隆慶元年以來建議之  
臣多及於此比見吏部于撫按保留官往往增秩加俸仍  
令任郡縣如故是久任之法亦畧已脩舉矣或者謂所保  
留官在知府則惟行於一隅而不徧於天下在州縣則惟  
行於舉貢而不及於進士不及今斟酌而推廣之未可以



言法之備也夫郡守縣令民之師帥厥任惟均且立賢無類進士舉貢何擇焉今或久於州縣不久於府久於舉貢不久於進士非政體也然欲行久任而不議官秩酬其勞勩即聖人與居不能驅之使安於職何則人情無所望而為者蓋無幾也其餘非懸爵賞以激發其心使奔走於功名之會則鬱鬱不平之意生於中其職且將解弛而墮於事如是而責其治理誠難矣臣謂方今之務宜通計天下府州縣官無論進士舉貢一體待遇即於循資推調之中間行久任超陞之法所謂久任者非必人盡久也第舉其聲名藉甚者以風其餘而已假如一時郡縣有習常慢令

贖貨殘民者即數月覺露亦必以峻法處之其官箴不失而未嘗有卓越之譽者仍照堂三年遷轉惟擇其約已愛民有異政在人耳目課為一友最者比及大計群吏之期各樞按官疏名以聞本部又按采輿論總核名實如果不謬所舉請 聖書褒勵諭令久任勿更轉徙其任亦不必限之九年也大率以六年為則知府即內寺少卿各省參政知州即陞郎中僉事知縣即取為左右給事中實授御史左右缺少仍補給事中隨授以應得 勅命其佐貳官果有廉謹敏幹治行殊常者候六年一體超陞如此則為吏者皆安官樂職計慮長遠不胥胥於旦暮可稱之功且

其勞之雖久酌之亦異人孰不願竭忠盡力務治其業以蒙上之知遇也哉臣見所拔用者不過數十人而天下郡吏莫不爭自洗濯精自心以承休德美行之不過數十年而天下之賢守令蒸蒸然布滿郡邑矣夫守令稱職則王德宣恩澤流百姓皆樂其所而無愁嘆怨恨之聲當今治平第一義恐無以易此再照郡縣官既已久任則缺之待補者必多臣以為職任相若者則改之閑散無事者則虛之遺逸可錄悉加揆羅大材可惜不輕擯棄是在銓曹一調劑消息之而何患乎官之不充法之不行也伏乞

聖裁 一處臧吏臣惟 朝廷設守令之官所以安民故

必應...非常之賞...蒙不可宥之誅然後長吏  
興行而黎庶獲以安業何也中人之情高官厚祿可以動  
之至其不肯者賞之亦不能勸則必盡法繩之而後有所  
懲所謂賊吏是已漢制以六條察守令而侵漁百姓聚斂  
為姦者居其首順帝時遣使察貪汙有罪者刺史二千石  
驛馬上之墨綬以下輒自收舉法至嚴也我祖宗朝綜  
覈吏治於枉法受賕者憲典最重嗣後稍從姑息人心  
怠玩遂至廉隅磨缺名檢墮失寢以成風不可禁制故先  
臣何塘謂受賕滿貫以上宜籍沒家產近日大學士張居  
正亦謂將賊私嚴行追併其言皆深切時務之要臣竊見

比來仕路雖稍稍改易流習而窮鄉下邑吏之縱恣自若  
其行如盜踞其欲如饕餮剝民之財罄於錙銖各撫按官  
耳目委諸下僚多為所欺蒙不即擿發即有敗露者又以  
寬紆容隱為良曲意回護以樹私恩其載下考語及奏劾  
疏中未盡其什一吏部據其詞而議懲創之輕者改調或  
陞工府官屬重者補其職任如此而已其有賊私狼藉  
衆所共憤者乃請旨提問所司竟聽縻日月照常歸結  
利法以容姦臣誠不知其可也且賊吏之愆非在於為名  
也其始也以市井狙儉之行冒膺名秩即垂涎民之所有  
欲以自潤及其囊橐既充溪壑已滿不韋而致敗罷官廼

其所甘心者方且覓良田美宅揚揚自謂得計而人亦以  
其居官致富目謂樵傑矣今欲禁賊吏而止于罰官是徒  
辱之以區區之名控之以不足無之爵祿而其非道所獲  
者不能損其毫毛安得不掉臂而樂去也夫以貪殘之徒  
漏網聖朝者不知其幾則敗壞補職又竟隨其策申至  
其甚者得從吏訊可謂盡法矣然復資緣以脫然則百姓  
之憤何由而洩國家之綱紀何為而振無惑乎寵賂日  
章而清白不著也合無申飭撫按官凡所屬有司悉心撫  
訪果有不自砥礪侵害下民者或徑自拿問或察奏處  
治吏部更加裁酌如係昏庸無知利歸旁側者姑照常罷

官但是入已賊私不徒論罷必如數追出助邊輕者追完放歸重者仍依律問斷如木索受答辱亦不足惜或謂是舉頗傷操切非所以明厚臣也切思此輩貪婪多以暴虐濟之自常俸外皆是朘削膏血民之貧羸孤弱者徃徃捐妻賣子殞命箠械以應其求蓋切齒腐心欲刺刃其腹中久矣此之重處所謂今而後得反之也宋臣范仲淹一家哭何如一路哭意亦如此臣謂此法果行則人皆恐恐然畏刑憲之及而斂其手足不敢輒犯天下疲民得以湔洗瘡痍沐浴膏潤太平之美可日月異矣夫久任則中材者有所慕于進職追賊則小者有所畏于後而不敢為非

臣之二議所宜並舉而實以相濟者也伏乞 聖裁 一  
廣用人臣惟 國家以科貢而途選舉賢才蒐羅之法至  
為詳密然執此而曰盡天下之人則未也蓋今之所取第  
一文學高第進者耳若夫豪傑之士拘于文而不能自達  
者豈盡無哉嘗考漢制既以孝廉賢良茂才明經取士而  
六部良家子多用材力為官又嘗下詔求新弛非常之士  
唐宋自制策進士又許大臣辟召與諸邑人等薦舉意以  
天下人材甚多文章經術之事不足以籠絡豪傑故博求  
而引用之如此亟也夫賢士大夫守道執義習先聖之術  
明當世之務進則為王國損退則有老死牖下而已豪傑



之士則不然其中國有推魯少文雅負幹倚膽畧絕世力  
敵千人者有諳曉兵事知韜鈴術數者有論辨縱橫可使  
絕域者此等之人何代不有朝廷能用之亦肯盡心出力  
自見其所長不用之則或托迹于畎畝屠沽商賈醫卜之  
間有所蓄焉而思動自古大臣為國長慮者當平居時常  
欲加意收拾之使其抑心下氣餽藉而不收發大難之端  
脫或忽畧不圖即不幸一旦有事輒圜視乘釁而起橫戈  
一呼群然嘯聚其流毒潰裂四出非日月可掃除者先臣  
仁濟所云在中國則為盜賊主謀在外境則為夷狄効力  
大率皆此輩為之也當今之時所謂豪傑往往而是山

之東西河之南北及關中徐沛之間尤甚御之不得其道  
則姦雄多自此出見之頗有椎埋鼓鑄武斷鄉曲招納亡  
命蔑視州縣如古大俠郭解劇孟之流且其自以仕進無  
階不嘗快快如鷹隼收歛不能忘飛揚奔騫也夫當平治  
之世而其萌芽已漸露矣加以四方凶旱民愁無聊或至  
弄兵霍亂此輩相率攘臂其間左提而右挈之則貽禍必  
非小小於此而欲為之計其猶有及乎臣愚竊思此輩其  
心亦頗效用當世特不能由文墨以進又懼上官為約束  
苦乏故寧死溝壑而不忍就方今疆場縹緲爪牙缺乏之  
際何惜升斗之祿不寵取而用之請令各撫按官多方採

訪果有知邊情善騎射及膂力技能絕人可以應明詔  
塞厚望者錄名以聞多者舉十數人少者五六人務在撫  
實不得徒任耳目苟應文具該部又於其中覈實用之如  
試有顯效則舉主隨加祿秩以酬獎之其或繆濫憤事舉  
主依律科罪以示懲戒行之數年則梟俊禽敵之士輻輳  
而出於此途將來必有能為朝廷立名攘夷狄者是  
國家于科貢兩途外又有得人之利即萬一有豪猾狂逞  
之形亦藉此可以潛消而豫制之是亦司國論者所宜慮  
及也伏乞聖裁一練民兵嘗考民兵即古寓兵于農  
之意而行畿甸為最急蓋京師去塞垣甚逼萬一有虞

警則都城戒嚴非多立聲援無以鎮定人心臣憶元年秋虜犯永平勢將西窺涿河羽檄日且數至臣曾與兵部臣議調兵入援兵部臣默然無以應也久乃曰無兵柰何當是時臣心竊危之年米極慮博訪因得練民兵可以入援一節甚為得策請試言其策蓋直隸八府古幽冀地其人沉鷁健悍慷慨多材力臣往聞河間保定等處民皆團聚為社分曹角藝日懸弓矢馳獵為樂大抵勇敢善騎射其天性然也今誠立法揀擇自可用以擁衛京師但恐處置失宜於民不能無所患苦而精銳者未必羅致亦為無益臣以為苟欲無擾民之害而又得精銳之用其道在編

愈不濫訓習以時委之利以得其心而已請 勅下巡撫  
令其督兵備官分飭郡縣有司略倣成周因田賦出軍之  
制總計戶籍若干除汰去老弱與單丁不用外其年力精  
壯者如父子三人報其子一人兄弟三人報其弟一人即  
州與大縣計之太公可得兵千六百人小縣可得千人每  
處兵分為二軍以其半為正兵半為奇兵即於編僉時取  
其武勇善技藝者覓奇兵之數次者為正兵皆登名尺籍  
呈送巡撫兵備處查操練之期定千秋防後農事之隙每  
年不過三月月不過三次紀律一倣軍中委知兵將領一  
二員教習之操練既畢令歸農無使有數聚之擾凡其收

隸尺籍者將平日雜徭役悉與蠲除以免本身丁銀一錢  
每年自操練外不得有絲毫差遣夫一錢乃最下之丁本  
不妨編派頭役于官既無所損而為兵者又得優免以蘇  
其困無別役以妨其業誰不踴躍應命者且因其用之為  
兵而萃乎行陣不用之為農而散於田里蓋不費廩粟不  
水庫帛而隱然自恃為保障是官民兩便之道也至於郡  
縣既已奉行之後該道兵備官仍感終親歷各府調各州  
縣兵至府驗其將卒有勤惰武備有生熟者大行賞罰以  
為勸懲數年之後兵皆精練即地方盜賊啓釁各兵足為  
防禦至於都城脫有警本兵奏請徵發以符契下之巡

撫巡撫下兵備等官除正兵留以城守將奇兵盡數調至  
各府各府景為幾軍以一大將軍領之通稽八府可得動  
卒數十萬馳赴近京要地以為聲援所以壯國威固根  
本永持至安之策無出於此者昔宋仁宗時藉河北強壯  
棟為義勇寇至則翔集赴援至孝宗時陳俊卿奏請民家  
三丁取一教之戰陣屯據要害待敵至以壯聲勢今欲點  
集民兵胡不引前事一觀之也或謂兵既棟擇當給以衣  
裝器械至操練時不可不懸賞以觀今須豫為料理臣查  
得近日御史清出畿內勦賊地土甚多雖有租銀真保一  
鎮各山口散兵後既有老家軍守之又添設民壯同守每

名編銀三兩有奇似為銀用其他尚有類此可取者合無  
令各巡撫一併勘議徵銀在官專備民兵之供費伏乞

聖裁 一重農穀臣聞農者天下之大本穀者民之大命  
乃帝王之先務也我 祖宗立極定制尤惓惓加意於此

宣德成化間常令各省布政司增設叅政一員所屬府州

縣增設同知一員縣丞等官專治農事及預備倉糴穀販

濟者令詳明所為愛憫元元計安四海之道其舊備奈何法

久玩弛從政者率視為迂濶而不談百年以來末利大熾

民心搖惑游惰成習田多汙萊數口之家至無餘蓄重以

急政橫歛愈不堪命歲稍不登狼顧莫救弱者轉瘠溝壑



強悍之衆奮臂起而為盜蓋繇勸課不行貯積無策以至  
於此所關繫非細事也臣竊度此以為方今之務亟宜責  
成各該巡撫令查原設叅政有無俱各坐委一員仍以屯  
田水利僉事增其職掌共領農事府州縣除掌印官外其  
佐貳官亦各查原設有無即定委一員分理當無事時兩  
司官分行郡縣禁戢游民招徠流移田地拋荒者募農開  
墾陂塘渠堰有侵沒墮塞者悉查出濬導使水潦得以決  
瀉旱乾有所澍積及屆農期則趣有司躬臨疆畔勉其稽  
事輕徭薄賦稍紓其力或有牛種不敷者官量給與以寓  
優恤補助之意如此則農夫日服其時而通畝者鮮矣夫

民貧生於不足不足生於不農未有農事舉而人不克行者也若積穀一節近日申明甚嚴但有司多視罰緩之入已為應得徃徃取充私橐不肯盡其糴買或偶因他事罰穀貯倉不過十之一二徒應文耳及過年饑民困倉穀告竭然後呈皇請屢卒無以相恤蘇軾所謂小人淺見不為君父惜民類皆如此非一大振飭之則民之甦息尚未可期今猶有言積穀之害者曰計數取盈則獄訟繁興湖南寬鄉則無積千穀夫天下豈皆湖南而不積穀果自可以無訟耶此皆飾說以撓成事者也至於各處鄉村宜隨其遠近略倣隋唐遺意皆設立義倉每豐歲則每糧一石令

加納五升總計糧若干得穀若干蓋不必多取即可分給  
為各倉之本有本則可以取息有息則可以濟民又于每  
倉擇一有物力人戶充義倉中頭以司收放仍一二年一  
換勿令偏累其他謹蓋藏以虞腐敗嚴稽驗以防侵欺禁  
別用以耗本息考慮實以行賞罰皆一一具為擘畫而蓄  
積有不足恃者臣不信矣凡此皆須二司官率屬行之而  
巡撫時時察其廢弛論奏重懲戒終具覆穀登耗欵散之  
數送戶部照對仍乞 勅吏部于大臣中采其高識遠見  
能為 國立事者為戶部侍郎居中調度如古無判大司  
農故事以總攝各巡撫等官歲加黜陟行之數年可望廩

更皆清家給人足水旱盜賊不足為虞富安天下之術也  
再照農穀之事至為繁細一應不周反致擾害於民臣愚  
心能知之口且不能悉數之况能徧以疏舉若夫博詢詳  
議期於事體精密可為萬世長利是在該部臣留意而已  
伏乞 聖裁

直陳時政切要疏

張居正

竊帝王之治天下有大本有急務正心修身建極以為臣民之表率者圖治之大本也審機度勢更化宜民者救時之急務也大本雖立而不能更化以善治譬之懸惡不調不鮮而更張之不可鼓也恭惟我皇上踐祚以來正身修德講學勤政懋以敬天法祖為心以節財愛民為務圖治之大本既已立矣但近來以人情積習生弊有頽靡不振之漸有極重難反之幾若不稍加更易恐無以新天下之耳目且天下之心志臣不

揣愚陋見攸思惟謹就今時所宜者條為六事開款上請用備  
聖明採擇臣不肖惟幸得以經術遭逢 聖主備位輔弼朝夕與  
同事諸臣寅恭諧協凡有所事自可隨事納忠似不必更有  
建白但臣之愚昧切見 皇上有必為之志而淵衷靜默臣下  
莫能仰窺天下有願治之心而舊習因仍趨向未知所適故聚  
避形迹披瀝上陳期于宣照 主德而齊一衆志非有他也伏  
乞聖慈垂鑒俯賜施行天下幸甚臣愚幸甚一省議論臣聞  
天下之事慮之貴詳行之貴力謀在于衆斷在于獨漢臣申公  
云為治不在多言顧力行何如耳臣竊見頃年以來朝廷之  
間議論太多或一事而甲可乙否或一人而朝由暮改前後

不覺其馳或毀譽自為二盾是非淆於唇吻用舍決於愛憎政多紛更事無統紀又每見督撫等官初到地方即例有條陳一疏或謾言數事或更至數官文藻競工體者每為所眩不曰此人有才即曰此人任事其實蒞任之始也地方利病豈盡周知蠻官賢否豈能洞察不過採聽於眾口耳讀其詞藻雖若爛然究其指歸茫未有效比其久也或非其自言者而忘之矣即如昨年 皇上以虜賊內犯特 勅廷臣集議防虜之策當其時眾言盈廷群策畢舉今又將一年矣其所言者果盡舉行否乎其所行者果有實效否乎又如薊鎮之事初建議者曰吾欲云云當事者

亦曰吾欲云云曾無幾何而將不相能士譁於伍異論繁  
興訛言踵至於是議罷練兵者又紛紛矣臣竊以為事無  
全利亦無全害人有所長亦有所短要在權利害之多寡  
酌長短之所宜委任責成庶克有濟今始則計慮未詳既  
以人言而行終則執守靡定又以人言而止加之愛惡交  
攻意見橫出讒言微中飛語流傳尋之莫究其端聽者不  
勝其眩是以人懷疑貳動見譸張虛曠歲時成功難睹  
多指亂視多言亂聽此最今之大患也伏望 皇上自今  
以後勵精治理主宰化機掃無用之虛詞求躬行之實效  
欲為一事須審之於初務求停當及計慮已審即斷而行



之如唐憲宗之討淮蔡雖百方阻之而終不為之挫欲用  
一人湏慎之於始務求相應既得其人則信而任之如魏  
文侯之任樂羊雖謗書盈篋而終不為之動再乞 天語  
丁寧部院寺衙門今後各宜仰體 朝廷省事尚實之意  
一切章奏務從簡切是非可否湏明白直陳毋得彼此推  
諉徒託虛言其大小臣工亦各宜秉公持正以誠心直道  
相與以勉修職業為務反薄歸厚尚質省文庶治理可興  
而風俗可變也伏乞 聖裁 一振紀綱臣聞人主以一  
身而居兆民之上臨制四海之廣所以能使天下皆服從  
其教令整齊而不亂者紀綱而已綱如網之有繩紀如絲

之有總詩曰勉勉我王綱紀四方此人主大阿之柄不可  
一日而倒持者也臣竊見近年以來紀綱不肅法度不行  
上下務為姑息百事悉從委徇以模稜而可謂之調停以  
委曲遷就謂之善處法之所加唯在於微賤而強梗者雖  
壞法干紀而莫之誰何禮之所制反在於 朝廷而為下  
者或越理犯分而恬不知畏陵替之風漸成指臂之勢難  
使賈誼所謂蹶蹶者深可慮也然人情習玩已久驟一振  
之必將曰此拂人之情者也又將曰此務為操切者也臣  
請有以解之夫狗情之與順情名雖同而實則異振作之  
與操切事若近而用則殊蓋順情者因人情之所同欲者

而施之大學所謂民之所好好之民之所惡惡之者也在  
徇情則不顧理之是非事之可否而惟人情之是便而已  
振作者謂整齊嚴肅懸法以示民而使之不敢犯孔子所  
謂道之以德齊之以禮者也若操切則為嚴刑峻法虐使  
其民而已故情可順而不可徇法宜嚴而不宜猛伏望

皇上奮乾剛之斷普離照之明張法紀以肅群工攬樞綱  
而貞百變刑賞予奪一歸之公道而不必曲徇乎私情政  
教號令必斷於宸衷而無致紛更於浮議法所當加雖貴  
近不宥事有所枉雖疎賤必伸仍乞勅下都察院查照  
嘉靖初年初定憲綱事理再加申飭秉持公論振揚風紀

以佐 皇上明作勵精之治庶體統正 朝廷尊而下有  
法守矣伏乞 聖裁 一重詔令臣聞君者主令者也臣  
者行君之令而致之民者也君不主令則無威臣不行君  
之令而致之民則無法斯大亂之道也臣看得舊規凡各  
衙門章奏奉 旨有其部看了來說者必是緊關事情重  
大機務有其部知道者雖若稍緩亦必合行事務或關係  
各地方民情利病該衙門自宜參酌緩急次第題覆至於  
發自 聖衷特降 勅諭者又於泛常不同尤宜上緊奉  
行事乃無壅蓋天子之號令譬之風霆其風不能動而霆  
不能擊則造化之機滯而乾剛之用息矣臣竊見近日以

來 朝廷詔旨廢格不行抄到各衙門縣從傳閣或已題  
奉 欽依一切視為故紙禁之不止令之不從至於應勘  
應報奉 旨行下者各地方官尤屬遲慢有查勘一事而  
數十年不完者文卷委積多致沉埋干證之人半在鬼錄  
年月既遠事多失真遂使漏網終逃國有不申之法覆盆  
自苦人懷不自之冤是非何由而明賞罰何由而當伏望  
勅下部院等衙門凡大小事務既奉 明旨須數日之內  
即行題覆若事理了然明白易見者即行據理判斷毋但  
諉之撫按議處以致耽延其有合行議勘問奏亦要酌量  
事情緩急道里遠近嚴立期限責令上緊奏報該部置立

號簿登記註銷如有違限不行奏報者從實查察坐以違  
制之罪吏部即以此考其勤惰以為賢否然後人思盡職  
而事無壅滯伏乞 聖裁 一覈名實臣聞人主之所以  
馭其臣者賞罰用舍而已欲用舍賞罰之當在於綜覈名  
實而已臣每見 朝廷欲用一人當事者輒有乏才之歎  
切以為古今人才不甚相遠人主操用舍奪之權以奔  
走天下之士何求而不得而曰世無才焉臣不信也惟名  
實之不覈揀擇之不精所用非其所急所取非其所求則  
上之爵賞不重而人懷僥倖之心牛驥以並駕而俱疲工  
拙以混吹而莫辨才惡得而不乏事惡得而有濟故臣請

畧言其槩夫器必試而後知其利鈍馬必駕而後知其驚  
良令用人則不然稱人之才不必試之以事任之以事不  
必更考其成及至愼事之時又未必明正其罪惟魯少文  
者以無用見譏而大言無當者以虛聲叨譽倜儻伉直者  
以忤時難合而脂韋逢迎者以巧宦易容其才雖可用也  
或以卑微而輕忽之其才本無取也或以名高而尊禮之  
或因一事之善而終身借之以為資或以一動之差而眾  
口訾之以為病加以官不久任事不責成更調太繁遷轉  
太驟資格太拘毀譽失實且近來又有一種風尚士大夫  
務為聲稱舍其職業而出位是思建白條陳連編累牘至

數其本等職業及屬茫昧主錢穀者不知出納之數司刑  
名者未諳律例之文官守既失事何由舉凡此皆所謂名  
與實懸者也如此則真才實能之士何由得進而百官有  
司之職何由得舉哉故臣妄以為世不患無才患無用才  
之道如得其道則舉天下之事唯上之所欲為無不應者  
臣願 皇上慎重名器愛惜爵賞用人必考其終授任必  
求其當有功於 國家即千金之賞通侯之印亦不宜吝  
無功於 國家雖頓啖之微散榜之賤亦勿輕予仍乞  
勅下吏部嚴考課之法審名實之歸遵照 祖宗舊規凡  
京官及三六年考滿并得舉引復職監給 恩典須明白



開具稱職平常不稱職以為毀訾若其功過未大顯著未  
可據行黜斥者乞將 誥勅 勲賞等項酌 量裁與稍  
加差等以示激勸至於用舍進退一以功實為準毋徒眩  
於聲名毋盡拘於資格毋播之以毀譽毋雜之以愛憎毋  
以一事既其平生毋以一肯掩其大節在京各衙門佐貳  
官須量其才器之所宜者授之平居則使之講究職業贊  
佐長官如長官有缺即以佐貳代之不必另索其屬官有  
諳練故事盡心官守者九年任滿亦照吏部升授 京職  
或即轉本衙門堂上官小九卿堂上官品級相同者不必  
更相調補各處巡撫官果於地方相宜久任者或就彼加

秩不必又遷他省布按二司官如叅議久者即可陞叅政  
僉事久者即可陞副使不必互轉數易以滋勞擾如此則  
人有專職事可責成人材亦不患其缺乏矣此外如臣言  
有未盡者亦乞 勅下該部悉心講求條列具奏伏乞

聖裁 一固邦本臣聞帝王之治欲攘外者必先安內書  
曰民惟邦本本固邦寧自古雖極治之時不能無夷狄盜  
賊之患惟百姓安樂家給人足雖有外患而邦本深固自  
可無虞唯自百姓愁苦思亂民不聊生然後夷狄盜賊乘  
之而起蓋安民可與行義而危民易與為非其勢然也恭  
惟 皇上嗣登太寶首下蠲恤之詔黎元忻忻方切更生

獨昨歲以元年蠲賦一半國用不足又邊費重大內帑  
空乏不得已差四御史分道督賦三都御史清理屯鹽皆  
一切權宜以佐國用之急而人遂有苛其搜括者臣近日  
訪之外論皆稱不便緣各御史差出目覩百姓窮苦亦無  
別法清沚止將官庫所儲盡行催解以致各省庫藏空虛  
水旱災傷視民之死而不能振而廣軍兵供餉百出而不  
能支是國未亢而元氣已耗矣臣切以為天之生財任官  
在民止有此數譬之於人血脈強弱自有分別善養生者  
惟樽節愛惜不以嗜欲戕之亦皆是以却病而延壽昔漢  
昭帝武帝多事之後海內虛耗霍光佐之節儉省用與民

休息行之數年百姓阜安國用遂足然則與其設法征求  
索之於有限之數以病民孰若加意省儉取之於自足之  
中以厚下乎仰惟 皇上即位以來凡諸齎醮土木淫侈  
之費悉行停革雖大禹之克勤克儉不是過矣然臣切以  
為矯枉者必過其正當民窮財盡之時若不痛加省節恐  
不能救也伏望 皇上軫念民窮加惠邦本於凡不急工  
程無益徵辦一切停免敦尚儉素以為天下先仍乞 勅  
下吏部慎選良吏特養小民其守令賢否殿最惟以守已  
端潔實心愛民者乃與上考稱職不次擢用若但善事上  
官幹理簿書而無實政於百姓者雖有才能幹局止與中

考其貪污顯著者不必引例發遣但將所犯贓私嚴行追  
併押發各邊自行輸納完日發回原籍為民不但懲貪亦  
可以為實邊之一助耳乞 勅下戶部悉心講求財用之  
所以日匱者其弊何在今欲措理其道何由今風俗侈靡  
官民服舍俱無限制外之豪強兼并賦役不均花分詭寄  
恃頑不納田糧徧累小民官府造作侵欺冒破奸徒罔利  
有名無實各衙門在官錢糧漫無稽查假公濟私官吏滋  
弊凡此耗財病民之大者若求其害財者而去之則亦何  
必索之於勞困之民而自耗國家之元氣乎前項催督御  
史事完之後宜即令回京此後不必再差重為地方之病

其也蓋各差都御史應否取回別用但責成於該管撫按  
使之悉心清理亦乞 勅下該部從長計議具奏 定奪  
以後上下唯務清心省事安靜不擾庶民生可遂而邦本  
獲寧也伏乞 聖裁 一飭戎備臣惟當今之事可慮者  
莫重於邊防廟堂之上所當日夜圖畫者亦莫急於邊防  
邇年以來虜患日深邊事及廢比者屢蒙 聖諭嚴飭邊  
臣人人思奮一時督撫將令等官頗稱得人日前守禦似  
亦畧備矣然臣以為虜加禽獸然不一創之其患不止但  
戰乃危事未可易言須從容審度以計勝之耳今之上策  
莫如自治而其機要所在惟在 皇上赫然奮發先定

聖志 聖志定 卽懷忠蘊謀之士得效於前矣今談者皆  
曰吾兵不多食不足將帥不得其人臣以為此三者不足  
患也夫兵不患少而患弱今軍伍雖缺而糧籍俱存若能  
按籍徵求清查影占隨宜募補着實訓練何患無兵損無  
用不急之費併其財力以撫養戰聞之士何患無財懸重  
賞以勸有功寬文法以伸將權則忠勇之夫孰不思奮又  
何患於無將臣之所患特患中國無奮勵激發之志因循  
怠玩姑務偷安則雖有兵食良將亦恐不能為耳故臣  
願 皇上急先自治之圖堅定必為之志屬任謀臣脩舉  
實政不求近功不忘有事熟計而審行之不出五年虜可

圖矣至於目今自守之策莫要於選擇邊吏團練鄉兵併  
守墩堡令民收保時簡精銳出其空虚以制之虜即入犯  
亦可不至大失此數者昨雖已經閣部議行臣愚猶恐人  
心玩愒日久尚以彌文塞責伏乞 勅下兵部申飭各邊  
督撫務將前事着實舉行俟秋防畢日嚴查有無實效大  
行賞罰庶沿邊諸郡在在有備而虜不敢窺也再照

祖宗時京營之兵數十萬今雖不足尚可得八九萬人若  
使訓練有方亦豈盡皆無用但士習驕惰法令難行雖春  
秋操練徒虛文耳臣考之古禮及我 祖宗故事俱有大  
閱之禮以習武事而戒不虞今 京城內外守備單弱臣



常以爲憂伏乞 勅下戎政大臣申嚴軍政設法訓練每  
歲或間歲季冬農隙之時恭請 聖駕親臨校閱一以試  
將官之賢否一以觀軍士之勇怯有技藝精者分別 賞  
資老弱不堪者即行汰易如此不惟使 輦轍之下常有  
數萬精兵得居重馭輕之道且此一舉動傳之遠近皆知  
皇上加意武備整飭戎事亦足以伐醜虜之謀銷未萌之  
患誠轉弱爲強之一機也伏乞 聖裁

急圖政要以保治安疏

毅士澹

頃緣災異叠見時事多艱該部官疏陳部臣議覆遵奉  
俞旨行令九卿科道等官講求用人理財事宜人具一疏  
各薦所知各陳所見上備 采擇臣濫竽九卿義不容默  
臣聞太學平天下章論用人理財始于君子先慎乎德蓋  
予謂人不足適政不足間惟仁義格心為急務誠以君身  
萬化之原幹旋振作之機固在上不在下也臣謹按科臣  
原疏所拳拳懇望在乞 皇上宣召大臣咨訪商確俾各  
以職條對務求實濟而該部覆奏亦請 仰法 列聖俯  
采群言將 宣召大臣一事亟 賜舉行以通上下之情

以消天下之變蓋皆有見夫治理要務莫切於此 聖明  
所宜留念必不可緩者也此不之圖雖條奏叢委封草山  
積奚裨實用哉夫人材賢否吏部職也考覈論薦冊籍俱  
存聞見訪求臧否素定即近日諸臣所舉豈能出吏部所  
知外乎若吏部雖知不敢用必拘于禁例資格非章疏所  
能悉耳 國計盈縮戶部職也出納經常素有成筭弊竇  
源委久懷隱憂即近日諸臣條議豈能出戶部所知外乎  
若戶部雖知難干議難干革必事有掣肘窒礙非奏牘所  
能達耳 陛下誠念時事多艱思得異才而任之惟 宣  
召吏部大臣令其面對凡實心任事輿論稱賢無間卑遠

廢棄並許破格論荐某宜於南某宜於北某過今可原宥  
其例宜疏通一一盡言之 陛下再與輔臣 面相商確  
隨材酌用則鼓舞激勵之下自然人思感奮足充任使何  
乏材之可慮哉 陛下誠念經用無竭欲知浮費而裁之  
惟 宣召戶部大臣令其 面對凡沿襲宿弊浮冗常數  
無問 官府纖鉅並許備陳直指某額可減某費可罷某  
宜月有清查某宜即時釐正一一盡言之 陛下更與輔  
臣 面相商確毅然 獨斷則懲文振刷之餘自然源潔  
流清可期饒裕何匱竭之為患哉昔宋臣趙普薦人至裂  
牘補進太祖親聽其言果得實用唐臣魏徵因宦者充外

使多妄奏請杜其源太宗曰非卿朕安得聞此語乃傳克  
使史傳紀二君納諫以為美談向非面對安得達其誠悃  
卒相孚信也臣比見吏部大臣於原任給事中石星御史  
詹仰庇二臣嘗請錄用此其心正欲仰成我皇上愛  
惜人材之盛德非有他也疏入並從報罷是吏部所  
薦且未蒙俞允矣戶部大臣於太和香稅庫局鋪墊等  
事嘗有論奏此其心亦欲仰贊我皇上愛惜民膏之至  
計非有他也言出即獲譴阿是戶部所陳言未蒙天聽  
矣傳有之人臣盡瘁宣力多從直言敢諫中得之故用人  
者與其下收瑕類之士不若優容骨鯁之臣如前吏部所

薦三臣雖未經獲過方乃其一念思國事之心臣固知  
必能忘身殉國終始無二也取斯人用之艱危緩急可  
恃賴不愈於使貪使詐起事無鮮卑輩益開倖進之端乎  
昔人謂天下之費有博約而今浮必求浮之自杜之故節  
用者與其加察乎速不若法行自近如前戶部所陳諸事  
雖浮冗不盡在此由是推廣使每事皆有稽登臣固知必  
能漸塞樊源漏卮可弼也及今日國之機節儲蓄定獲實  
效不愈於毛舉遺摘為移甲就乙計重貽斯民之困乎臣  
聞先朝文事體法未載不敢重同臆度妄有塵 清竊觀  
言官部臣建議奉慈意所歸重寶賜至要未宜徒付空言

皇明...  
故近愚之見惟願 聖明下順輿情於 宣召咨訪亟  
賜施行凡用人理財事宜但責成部臣所言常理 俯垂  
聽納 廣仁恩以容艱直 慎儉德以懷永圖則實政日  
修繁文日省所以消弭災變感召休祥安內攘外永保萬  
世治安端在此矣

陳愚惻以廣 天恩疏

顧存仁

臣聞宋儒周敦頤曰乾稱父坤稱母子茲覩焉乃泯然中  
處民吾同胞物吾與也大君若父世宗于大臣宗子之家  
相凡天下疲癯殘疾惻獨鰥寡皆吾兄弟之顛連無告者  
也至聞 先師孔子曰黃帝堯舜氏作通其變使民不倦  
神而化之使民宜之是以自天佑之吉無不利而終之曰  
垂衣裳而天下治蓋取諸乾即是知人君與天地常相為  
流通君道失而天下否 上天未嘗不降災以示怒君道  
得而天下泰 上天未嘗不垂祥以示喜而人君所以知  
化以善迷窮神以善繼者又未嘗不以天下之心為心天



之所怒者人君亦怒之天之所喜者人君亦喜之此天人  
交感之機父母宗子一氣流通之妙一定而不可易者是  
故帝王之治始於羲農成於皐帝至堯舜則通變神化法  
制大備而鳳凰來儀自堯舜之後歷幾百年至成周之治  
肇基於后稷顯承於文武成康則制禮作樂郁郁乎文而  
海不揚波當時之替其治者不過曰恭己曰無名曰刑措  
不用是知堯舜成康之法天為治也嘗其法制之未備人  
文之未治未嘗不乾旋坤轉發揚蹈厲以新天下之耳目  
比其法制之既備人文之既治又未嘗不歛寂神功休養  
生息以疑天下之心志此其治所以至太平稱盛說者謂泰

和在唐虞成周宇宙間者有自也自成康之後歷千餘年  
至我太祖高皇帝出斟酌漢唐宋制而一準於成周  
我成祖文皇帝又重起而恢之而其治可謂一新矣迨  
我皇上中興御極十七有紀凡天下之利病制度之因  
革或出於祖宗之未暇或由於近代之廢弛莫不次第  
舉行煥然大備而寶露靈鷲不一而足乃今秋明堂  
配享稱祖稱宗而景靈尊見亦不旋踵及至昨朔  
冊上皇帝上帝之大號而天心下鑒星月爛然加尊  
高祖高后之鴻號而祖廟垂歆天日晴朗當其時宇  
宙之和氣充塞臣民之惟祈無間雖唐虞成周之際真元

會合之運恐無以過於此者則朝廷之禮樂可謂曠古而無倫皇上之功德可謂格天而無二矣臣備員該科濫叨侍從何幸身親見之竊有一得之愚可以迓天休頌勳者不為陛下獻之豈惟所以負陛下抑且以負良時矣謹條為五事冒昧上陳伏乞勅下廷臣詳議題請推類施行務使天下得虞周之盛而萬世之下復稱陛下為恭己無名刑措不用之君此實千載一時也若我皇上恭默以承天休靜息以培民命此又在陛下躬行而獨得之者臣不敢一一煩瀆聖聽一曰廣曠蕩之詔臣聞孝子之養親也樂其心不違其志

是故父母之所愛亦愛之所敬亦敬之至於犬馬且然而  
况於人乎今夫 皇天上帝 陛下之父母 陛下 皇  
天上帝之宗子也而天下之顛運無告者又皆 皇天上  
帝之所生 陛下同胞之赤子也今我 皇上因 明堂  
配父而冊 天尊 祖此自古未有之典禮也 天心鑒  
悅而雲日燦爛此自古未有之祥瑞也近該刑部審錄重  
囚而特詔暫罷上廣 天恩及該御史胡于中奏決罪囚  
而順天八府一體 詔罷此又自古未聞之 恩澤也目  
今 詔示中外使不溥承 天意以廣 天恩緊破常調  
以垂曠典則 陛下視今日亦猶夫常耳何以昭示華夷

而超越今古哉臣愚以普天之下莫非王土幸十一之濱冀  
非王臣 皇上之所子愛者不止於京師我 皇上之所  
哀泣者亦不特於畿輔也即今天下罪囚暫免行刑者止  
於畿輔而已耳嗚呼是不知 畿輔之外業已屢決而不  
及奏免者獨非 皇天之所生而為 陛下之赤子乎他  
如往年謫戍諸臣不下百十餘人昨因廷議俱已 詔宥  
無遺所未及者止於馬錄楊慎呂經馮恩等數人爾即今  
顛沛歲久創艾日深而劉濟豐熙聞知病死其他摧折風  
靡所未知者恐又不止此而已則今天下之顛連無告臣  
知未有甚於此輩者切思六合同春而一夫不獲瀕堂撫

笑而向隅獨泣臣決知 皇上之心必有所不忍者矣萬  
一不蒙 恩宥而賁志俱沒豈不為 大造之憾而至仁  
之累哉伏乞 勅下廷臣議擬合無今日 大詔之頒凡  
臣民 恩賜破例加隆至於寬宥無辜比前特廣其他謫  
戍諸臣一體 矜宥 俾得生還鄉土均為 聖世之民  
同歌太平之盛豈不休哉至於節年言事謫降與夫邇來  
舉薦諸臣併望推廣 天恩不拘常例一體查奏陞用及  
或自後言官狂妄而志非有他者亦乞 賜優容豈惟  
民臣之幸我 皇上渾淪平蕩之治真與天地同休而萬  
物一體矣二曰崇安靜之吏臣聞漢帝元和之詔曰俗吏

矯飾外貌似是而非朕甚厭之甚苦之安靜之吏悃悃無  
華日計不足月計有餘此誠王者之言深識治體之詔也  
今我皇上制作無前而上天垂鑒禮樂之蓋世可謂咸  
備而無缺功德之及人可謂深洽而無外矣雖補偏救弊  
之方時不可無而國家之元氣生民之命脉此正  
陛下與天下休養生息相忘於垂裳而治之日也夫何邇  
年以來守令出宰往往厭棄舊章好為新政不究國家  
之大本大原惟屑屑於簿書期會之間不詳生民之大利  
大弊惟瑣瑣於毛錐聲色之末以為不如是不足以取勝  
於前官而受知於當路如與一利也名曰愛人後之欲自

附於愛人者復欲更張之不知 祖宗之良法固在也利  
未及而民先不勝其擾矣况未必利乎如除一弊也名曰  
節用後之欲自附於節用者復欲裁省之不知有司之用  
度固在也用日節而民益不可為良矣况未必節乎此自  
昔之常態莫有甚於今日者使為當道者更復惟其名不  
惟其實形之薦剋考之課最者俱若人焉則後之為政者  
安得不效尤之而人甚一人日甚一日耶信如是則政體  
之得失生人之理亂彼必至於不顧其勢不得不術奇以譁  
衆姑指以待遷蓄惠積弊以遺後人豈有肯加惻怛於細  
民助 陛下流教化者耶此仁人之所隱憂而 國柄



者不可不亟反之也臣惟 祖宗之法未嘗不善而勢之所趨或有所偏而節年言官之建言廷臣之建議頒之詔諭詳悉無遺至於今年天下朝 覲官員欵開利病吏部採擇題行者尤簡要而切當但各官到任不齊邸報之抄傳未盡司府之文移浩繁新官之民情未諳其勢不得不視為故紙束之高閣愚者限於不及觀智者眇為不足觀反欲出已見以創為新政此 陛下所以有配天之德格天之政而天下黎元未得皆享安家樂業之休者未必不由於此伏乞 勅下該部備行內外官員務要上遵 皇祖成法盡修職業不必增創為新政以紛擾或令該部即

將近口條約所陳利弊及查近年欽詔事宜凡有益於  
郡縣者悉摺以帙過初選官員如降頒知事例人授一冊  
以便省覽未<sub>二</sub>不為筮仕之助而國家之元氣生民之  
命脉庶幾培養其一二而天休永膺矣三曰重撫按之責  
臣聞天下之休戚係守令之賢否天官所視以黜陟生民  
薦劾是撫按者寸令所視以賢否天官所視以黜陟生民  
所視以休戚即古伐天子巡狩之職而可任非其人如往  
年皇上勅諭部院曰欲守令盡職又在巡按御史克盡  
職以為表率他自不敢不勉近該吏部題選急缺風憲官  
員事奉聖旨近來御史出差徃徃恣肆不遵憲綱今後

你每務要揀選老成持重的補用不許一槩濫授大哉  
皇言誠切中時弊矣惟撫按之薦劾不貴多而貴精至於  
巡行之懲勸不以刻而以慎昔人所謂賞一人而天下勸  
罰一人而天下懼者固此道也以薦劾言如近年之指深  
刻為名流目循良為廉潔者固不足道至若所舉者必欲  
盡其人以市恩而漫無皂白之可別所劾者必欲得其人  
以備數而不顧他長之可取則亦非公平之體也以巡行  
言如近年之捨琴鶴而肥身指狐狸而埋轍者固不足道  
至若以羨餘為課最而悉之查盤者務欲設法坐贓以除  
強為能吏而託之訪者惟蝕入人之罪則又殃民之尤

者也他如唯諾攀攀而不思士風之日下趨走問謁而不恤驛傳之騷擾近該湖廣都御史顧鄰兵科都給事中朱隆禧已言之矣至於吏調一節尤所當慎臣惟天之生材不甚相遠而許丞應吏重聽何傷以操觚染翰之徒旦夕臨之於戈上當道者遽憑喜怒而責成效不知數易長吏送故迎新所易新吏又未必皆賢徒相益為亂耳此漢臣黃霸之言尤為今日切要也伏乞 勅下都察院行令撫按今後按臨務要恪修職業共持大体以自表率至其舉劾懲勸更簡調繁以報 陛下者必精必慎以保我黎民至於各官之陞調撫按之推選該部亦不得輕舉濫授以

交固其心則 國家之元氣生民之命脉庶幾培養其一  
二而天休永垂矣四曰慎考察之政臣聞人之才行自昔  
罕全苟有所長必有所短若錄長補短則天下無不用之  
人責短舍長則天下無不棄之士是以伯鯨治水無功必  
待九載而後考黜臯陶為士執法而堯宥之三信夫人材  
難得而罰疑惟輕也目今京官而當事者不以惜材為念  
而精考核臣恐以二卵棄千城以能言信宰我不肖者漏  
網而為善者懼矣臣聞 祖宗之朝治化渾淪人皆修飾  
而考黜數少至成化弘治之間而此意尚在也昨年考察  
京官而至今稱寃未必非各官之罪而當事者亦或徇耳

日為是非任喜怒為憎愛植同異為怨息失之太而過刻也爾因廷臣建議各官之負屈于下者陛下數數詔舉而用之得非以往年之太濫而人材之可惜乎殊不知今日所謂賢而舉用者即往年所謂不肖而考黜者與其憐舉之于既黜之後孰若精慎之于未黜之先乎此其情不可以不矜而當事者不可以不察也又况皇上御極年久德化之洽浹諸臣者比前特深而諸臣之漸濡而向化者脩飾亦異比正陛下與天下相忘于垂裳而治之時與諸臣相忘于家人父子之日即今大禮告成皇天垂鑒薄海內外皆欲同春而諸臣之服勤左右奔走

後先周旋侍從之間親見德化之成者顧不大垂曠  
典以錫其身家以矜其罪過此豈皇天一視同仁之  
心陛下推恩自近之意乎伏乞勅下部院明年考察  
務以愛惜為心以寬厚為本秉公持正開誠布公比往年  
事例特加情恕以仰体陛下之意以上者皇天之心  
陛下之于自陳待罪者亦乞槩賜優容待天下以君子  
長者之道則國家之元氣生民之命脉庶幾培養其一  
二而天休永垂矣五曰抑邪佞之風臣聞堯舜之命禹  
精一執中之言聿聖之而又諄諄曰無稽之言勿聽弗詢之  
謀勿庸孔子斟酌四代之禮樂告顏淵而又終之曰放鄭

聲遠佞人信夫邪佞之言易惑而可畏也乃今如明堂  
告成雖因豐坊之建言聖心之定議已久矣吳璋何人  
而議如誤農害義莫甚於釋氏之徒皇上之欲化正有  
旨矣儵疑秀何人而乞度其他蟬噪蛙鳴紛紛不已獻書  
獻頌源源不絕釋此禮樂大明之時天心垂鑒之日  
不預為詔諭以禁其將來臣恐造言生事以瀆聖聰  
者不止於吳璋巧言令色以搖國是者不特於葉凝秀  
矣伏乞榜諭中外以昭示人人使知吾聖明正教中  
天如日或有前項之徒出位陳言乘間希進者各該衙門  
務要參駁究治及照考察京官目今在邇近來遊食之徒



多有罷閑官吏黜退生儒脫逃軍匠潛住京師希圖教唆  
本狀詐害良善挾制官府報復仇怨甚至匿名投書晝夜  
黏貼糾習成風漸不可長蓋有不止於希求進用而已者  
近該禮部叅治生員黃淮奉 聖旨今後罷黜生員并各  
色人等潛住京師假以建言為由希圖進用及寫本狀教  
唆挾騙人的着緝事衙門訪拏照例枷號發遣 陛下之  
意已先得之矣伏乞通行巡城御史緝事衙門預令用心  
緝拏重則問發口外輕則遞回原籍仍責月報有無以驗  
勤惰務使公議止出於臺諫而無容喙於蟲蟻 國是常  
持于 廟堂而不搖惑於萑菲則政教一而風俗美人心

定而士習端 國家之元氣生民之命脉庶幾培養其二而天休永垂矣

陳愚衷以復 聖諭疏

郭維藩

今月十二日伏蒙 御札賜到 內閣 聖諭曰今日講  
官惠曰省無益之費停不已之役又維藩曰去急操更張  
之弊務敦厚博大之規卿等其以朕意諭問之令其將所  
指者開陳以採時急務欽此臣於是仰見 皇上愚  
夫必問邇言亦察與大舜真異世而同符者臣承 命驚  
惕罔知攸措臣意之所在則不敢隱於 君父之前也夫  
操急者博大之反更張者惇實之反臣觀近日人情喜彼  
而厭此誠有月異而歲不同者試以人所見者言之 國  
初官民衣服各有定制見於會典者可考也今官及士庶

多製高簷桶子冠及濶袖道衣服之以至但僧之賤亦有然者此更張之見於衣冠者也士君子平居講論踈略於人事之實致察於陰陽變化之微筆其誕說以訾先賢號為理學此更張之見於言語者也及其相接甘言詭容鞠躬為禮交手至地究其中心誠意略無恬然相尚莫之知醜此更張之見於交際者也若夫居官者以濤張為變通以安靜為腐鈍以寬厚為無能以嚴急為才幹以公直為矯俗以軟媚為適時譽彼毀此伸彼抑此不以為異此更張之見於人才者也夫言語衣冠交際關乎風俗者也如是則俗薄矣人才關乎政事者也如是則政靡矣是豈細

事而聽其所至我恐非所以一道德而同風俗也我太祖皇帝取庶常吉士之意選進士為庶吉士分置近侍衙門太宗皇帝因之故名臣多自此出今建議者以為市恩樹黨而不選則育才之途塞矣至於祖宗歲貢之制止以食糴年深者起送疏壅滯略器使也而邊方之貢不限年資止起考居優等其法則又踈矣蓋以邊方之士其學問文詞不及腹裏生儒也今建議者主於考選貢舉大英妙之人既於科目中取之而歲貢又復參取則年長者永無出學之時而邊方之學必至廢貢矣夫先王之制則者守門瞽者司樂無廢人也今年長之貢其才縱無可取

然所習經書未必盡至廢忘使司教訓亦可責效今如此則祖宗曲成人才大小並用之意失矣若夫提學之官以道德教化之效非可以近小責也今以考起歲貢生員黜退五名不問歷任久近一槩降用似亦誣矣夫士之類資性有遲敏識見有淺深功力有生熟考校之際其高下優劣前後懸異雖當事者亦不能自定况提學乎朝廷以道德教化之任授提學而以考校之細故罪之是放飯流歎而問齒決之類也非所以重教化而求實效也近又於邸報中睹各衙門條陳事件雖多爲國之至計但立法過嚴求人過深者間亦有之伏惟聖心虛明神妙萬

聖德涵聽言用中若決江河恐采納之下普賜施行則  
天下或有受其惠者臣愚有激於中犬馬之誠不能自己  
故於講章內及之茲重歷天問豈敢隱諱以重不忠之  
罪哉輒敢披衷上陳伏望聖明念國家政教之重  
審垂憲貽休之謀復庶吉士之選傳選貢之例免提學  
之罰明諭臣工戒異尚崇本實以修職業仍乞於條陳  
之言擇其籌慮弘深事可經久者行之如是則國家有  
利生民蒙休其於時弊或可少祛

陳愚見以裨 聖治疏

凌儒

臣謂人臣生值 昌明之時復遘可言之會乃不能殫心  
畢知以裨時政之萬一不可謂忠臣愚無知待罪言責久  
矣茲者伏遇 聖明夙夜孜孜以求治理而大臣亦多精  
白以承 休德臣愚偶有所見敢復避忌而不一吐納於  
君父之前哉臣竊見 今日近臣清肅矣而外臣之貪墨  
者未見回風選將公明矣而操軍之虛冒者未聞改轍茲  
慝屏除矣而賢哲之伏處者未遂登崇此皆海內日昃昫  
焉延頸企踵以俟而不容不蚤慰其心者也臣謹據事條  
列如左伏望 聖明俯賜採擇施行 一曰重貪墨之罰



以勵頹風蓋 國家建立在外大小臣工凡以為潤澤生  
民保安地方之計而其最切且要者則在布政與知府知  
州知縣等官苟此輩不貪則保釐司牧咸得其人民瘼庶  
幾其有瘳矣柰何此輩提方寸之印任意伸縮錢糧朝夕  
營私執獻朴以鞭笞百姓其所以括取常規舊例火耗秤  
頭與夫因事受贓指公科歛甚至假借軍餉名色動罰大  
家富戶輒至幾百幾千椎髓剥膚民不堪命至是極矣然  
其所以肆無忌憚者亦以贓吏之罰太輕蓋曰縱或敗露  
彰聞重不過為民次亦不失冠帶以去此外更無憂矣則  
其所以嗜利殉財惟日不足又何所顧而不為哉臣謂

今日在內臣工率相重名檢而遂者直而明旨屢頒後  
詳諄乎私覬是禁迺日聽外官之言愚如故不為破格一  
處如吾民之倒懸何合無勅下該部通行撫按將屬內  
貪墨異常者不得優以藩司官尊卑科可惜不得待以朝  
覲罷斥差完論劾即不時指實奏聞仍令該部今後遇  
有指名特奏者不得槩擬閑住為民務須重擬以憑擊解  
來京追賊治罪其事情稍輕應行提問者該部仍酌地方  
遠近限以具奏之期不許歲月遷延復致倖免其有先  
經論劾見行提問久而不報者通行切責為何姑息晏姦  
如此則禁例之申飭益嚴風聲之感召自別而懲一警百

之餘糜食贖者稍知改弦易轍矣 一曰革虛冒之兵以  
求實用蓋 國家設置春秋操軍凡以護衛都城即古所  
謂采薇之戍最甚善也奈何法久弊滋有空名而無實蓋  
除山東河南尚依限赴營積弊頗少者姑不論外獨江北  
直隸臣自束髮以來未聞每年有一軍上班有一批廵附  
卷者邇來雖立法稽查甚嚴領操官參提降罰殆盡卒不  
能使一人來京何也蓋中都留守司所轄凡操軍共四萬  
四千有奇通計行糧銀一十四萬餘兩各在該府關給百  
計留難如該班應給銀一千止先給與三百即三百之內  
又皆加一扣除領操官得此止帶一二管事人役逡巡赴

京隱姓諱名上下打點于以東支而吾萬一稽查即便棄營而走矣其所以頂名代役者又多在京積猾之徒專一用強包占而營官以納賄為便該吏以得財為常左右通同剋減賣放者十且八九此其行無所資勢不能來而姦有所售且不必來其為弊非一日矣夫 朝廷外則歲費銀十餘萬兩以給軍內則歲費米數萬石以養軍乃竟無分毫之用或者猶謂法不可以卒變是徒知愛禮存羊而不知採華忘實者也合無 勅下該部再加議擬將江北操軍免其赴京止將原額行糧銀兩如數徵解仍於應操各軍名下每名量追銀一兩謂之免班責令衛所掌印官

依限徵收批差領操官一併解部則內外所積歲可得銀十八萬兩有奇然後付工部以十分之三以為各營夫役之費貯兵部十分之七以備緩急召募之需蓋所謂一舉而兩得之矣其在山東河南附近常來者則嚴行清查一如該部所議如此則實既夥而名亦存財不歛而用自足達權通變之餘而官軍公私兩利俱存矣 一曰拔隱逸之材以振士氣蓋 人主遠憂為其妨治籲俊將以維風固有並行而不容偏廢者乂我 皇上臨御四十二年以來壽考作人凡布列在位者固濟濟多譽髦之士然其砥礪名節伏處山林者求之海內可謂盡無其人哉舉臣所

知川充養純粹輿論久平有所謂吉水羅洪先其人者  
誼優長鄉評推重有所謂華亭林樹聲莫如忠臨川徐良  
傳其人者廉正自守終始弗渝有所謂汶上吳嶽其人者  
彊毅有為盤錯不變有所謂金谿吳悌其人者此數臣者  
或懲創益深而才行可用或沉疴久起而年力方強即今  
身處獻畝之中非不忻忻幸有昇平之遇而思欲一置身  
於 聖明之朝也苟失今不蚤為錄用而風采不表見于  
後固若輩之所甘心者而野有遺賢其謂之何臣謂頃者  
既多罷斥匪人而將來復考黜不肖人才亦幾于乏矣此  
而舉隱逸以接續之誠 今日之所不容緩者合無 勅

下該部再加採訪果臣所舉或係非繆妄將羅洪先等隨材  
器使及時登庸使不使臣愚冒知而不舉之嫌復不使天  
下抱舉而不用之嘆若夫限于耳目未周聞見未悉許地  
方撫按各拔其尤疏其名以聞如濫舉以樹私恩若三  
十七年借邊材以希進用者連坐所舉如此則江漢鮮垂  
綸之士四方集千里之材而拔茅連茹之餘庶在列者咸  
知所觀感興起矣伏乞 聖裁

竭忠以陳政要疏

鄭得海

伏惟時方多故萬姓爰咨頃年以來上持議論下煩終之  
及民之澤下實窮愁局踏畧無樂生之心工賈農商各失  
其業兵災徭賦率土靡寧撫雲遼代中原之脊也鑿鼓一  
聞則三關震動徐梁齊衛天下之腹也洪波蕩折而四顧  
無煙荆襄秦洛形勝之區也強狼憑依而竊聚相弱漸宜  
困廣財貨之藪也師勞費劇而茲完未殲搜歛日新耗窳  
日甚請給日增於藉荒裕庾日罄於那移 宗藩之坐食  
無歸中澤之哀鳴尤慘舟車盡散飛輓多艱梓柏既空加  
鎖猶逼民已窮而事益不可息散已極而法竟不可行饑



葦原荒朱殺邊關肅條閭里烽火關河武衛凌夷卒伍驕  
怨內憂外棘百孔千瘡物怪人妖天鳴地震彗星而見於  
尾女日月繼食於元春鬼神吉凶舊書濟至緩急無備根  
本潛搖殆有陳涉阿房打之徒窺伺於世雖李綱宗澤之  
才展布猶難天心人事種種可駭臣等常慟哭流涕於  
陛前 皇上應卧薪嘗膽於宵旰也夫饑寒逼身易為衣  
食罄罄赤子 聖主之資若不及今定周家桑土之謀切  
虞廷困窮之懼則上天所以警動海內者適以資他夫而  
今之最急孰如用賢乎諸葛亮曰親賢人遠小人此先漢  
所以興隆也親小人遠賢人此後漢所以傾頽也 陛下

御極以來。詆陷恭默已三期矣。濟濟多士。豈無一當聖  
心似可少慰承式之望矣。憂虞閔恫。天步艱難。又值下容  
靜逸之時矣。寧曾召問一大臣。而廣一誠。官賞納一諫士。  
以其直思患豫防之策乎。竊慮高亢睽孤。乾坤否隔。欲見  
君子阻於車鄰。呈約巷牖。寂無取舍忠言。重折檻之罰。儒  
臣虛納誨之功。姬姜違脫珥之規。周召無同舟之義。日

親絕疇咨之益。便殿邀晉接之期。回言既懲。趙普蒙統  
而補牘。內批徑出。蘇轍何目。以封還紀綱。廢於因循。賢  
愚襲於玩愒。功罪之欺。蒙罔核浮繁之文案。徒盈善類。既  
失於振揚。屬階陰啓乎奄寺。言涉官府。輒肆阻撓。梗在私

門堅不可破始也童牛羸豕之圖不豫他日城狐社鼠之  
計莫施逮其手握王爵口含憲風行勢協彙積權移會使  
台輔具員六卿拱手元良惛惛於孤一弱倒驅於冠裳  
茲霜雖未冰月已幾望前車不遠矣况旁觀宇內  
果何時也而處堂燕雀蔽目焉新優游朔風孔慘深  
顧隱憂誠恐川潰土崩一旦决裂不可復救萬眾汹汹皆  
謂群小侮常明良疎間自開闢以來未有若是可以永安  
者寧顧倚之由頤裕蠱而端拱淵默迷可濟蹇亨屯乎  
陛下不自以宗社之憂為憂縱有忠臣烈士以憂陛下  
下之憂亦何能上達以自效也伏願早奮英斷之剛於

以決大計而勿為小故之所淆弘昭濬哲之明於以任君  
子而勿為僻昵之所惑上天元子之責至重必思栽培  
傾覆之命為難謀下民父母之望至殷必思向背晷險之  
情為可畏以美色奇珍之玩而保瘡痍以昭陽細務之勤  
而和庶政以蠻夷為關門勁敵以錢穀為黎庶脂膏拔用  
陸樹聲石星之流以建法家拂上省納啟士儋翁大立  
等疏以求鯁議訐謨經史講筵臣民章奏必與所司面  
相可否親授絲綸都俞一堂乃成朝著萬幾之裁理  
漸熟人材之邪正自知察變謹微回天開泰計無踰此不  
然而或仍彼故習則雖臯夔伊傅接踵都門臯董公孫

昌言盈耳終何補於國是之萬一且三年無及於蓄艾  
幾事一去不可為矣愚陋微臣本無言責數年家食忻際  
清時廼見邪正相持賢人掣肘太平未兆感憤激衷冒犯  
天威觸怒權勢自知弗宥伏祈聖明垂鑒臣心無他更  
勅閣部科道諸臣再加看議如果臣言頗或可採即乞俯  
賜施行蒼生幸甚

時務最要三事疏

魏時亮

臣聞帝王之治以親親為先以禦虜為急以仁民為大方  
今天下有三大患 親親則藩祿不給矣禦虜則邊餉不  
支矣仁民則公私告匱矣 皇上冊位 東宮首念 宗  
藩祿糧之缺東西廩警會集多官安攘之謀 登極布令  
重軫國匱民窮之急則我 皇上所加意者固恒以此三  
大患為首務臣等效忠君父者又敢不竭犬馬之思而念  
切 國家之計哉語曰厝火積薪之下火未及燃尚以為  
安今日 國家匱乏之勢何以異此臣請為 皇上備言  
之臣等伏聞 宗藩者 天潢之戚脉也匹夫而饑寒

皇上且將惻然動念矧天潢乎廼今宗室蕃盛廩祿日增各處竭民脂膏不足供歲入之半祿厚者猶可展祿薄者轉死溝壑昔人謂饑寒切身雖慈母不能保其子而今者遠在天潢非細故也饑寒迫其外復無禮義以養其中有識之士方抱長慮矧日前已難支持即日後作何措處此而不為之計真實誼所謂及今不治必成痼疾者矣臣等淺見薄識何能為謀顧區區一念愛國不容自已嘗伏思之有一時教養之計有百世經久之計所謂一時教養者何蓋宗室最多之處貧困焉極矣子弟失教之素不檢者多矣創立宗學不但為禮義之閑實可資為

生養之地伏在今日切不可視宗學為緩圖也祿養之性  
或驕淫是肆禮義之習非預養弗成勢眾易於變生困極  
易於為暴苟不籍禮義以維之詎能久乎是以宗藩條  
例首載乎此而各處並未舉行者何哉以事有本原得其  
本原則事可就緒今宜申勅巡撫如例內所謂悉采  
武岡王議特建一學特選宗室中行修譽著者一人為  
宗正以主宗學一應事宜專責巡撫為提督官此事之原  
也三者如其議然後教誨師生習學出學及稽考賢否并  
放縱傷教者叅奏降革之條方可責在巡撫著實舉行但  
提督在巡撫而教訓仍責在提學地方大遠并責在該



道守巡等官其宗生多處特建一學果少處即宜於府縣軍民學內闢除空地一段創立一祖訓堂并號舍以便宗生肄業宗學教訓守重德行宜訪其性度時加拘檢詢其素行立為勸戒凡宗生宗饑困率由奢侈所致教訓之中更宜申重守身節儉之義嚴加提撕警覺蚤令習與性成若宗學條教脩明宗生各就規矩守巡等官俱聽巡按特薦不次超擢然臣等又謂可資為生養之地者蓋貧窘宗室於中有行誼最著宜加風勸者責令巡撫舉來在學於常祿外養以訓導一官之俸舉當必賞濫舉者罰其餘極貧無倚所當賑救即非行誼應舉者宜於常祿外日量

給粟米賑之有貧不能葬者且呈到學量助其宗生固宜  
少課之解而貧示子弟更宜復開醫學一路延取醫師教  
訓是禮讓貧與交相為養誠今日慶宗藩之急務焉但  
貧示之勢亟矣或乞食道途或投身傭隸此固途人所不  
忍示然郡王之支派伊邇者何獨忍之况祿厚者坐享  
貧道者環視非久安之道也今宜因宗學之建定議  
郡諸國各仰答祖宗之靈深思一體之誼特開勸學睦  
宗之例凡祿萬石者歲薄捐五分之一祿二千石者歲薄  
捐十分之一祿一千石者歲薄捐二十分之一扣存該處  
衙門悉收作宗學內風行誼賑貧乏助斂葬之用夫勸學

睦宗為善最樂我 皇上特賜重書扁額以獎異之各分  
祿之數歲者為例此尤宗學所當聯屬之誼也凡此皆不  
過一時教養之計耳苟為百世經久之慮宜及今蚤為之  
計焉蘇軾有言聚則爭於不足之中散則棄於有餘之外  
今貧宗多處聚居一城不但民力難供抑且地方有限在  
官府莫能為之謀即各宗目為生計亦無所措手足焉語  
曰聚則爭爭則亂無事既相尚以驕侈之風有事又相邀  
為挾制之術皆聚故也茲急宜散之於 宗室最多極貧  
之處如平涼大同開封等府專責該處撫按就本省相度  
濬州某大縣去守巡稍近地方可安插 宗室者奏

請酌量分封然後生計可活事奪可弭但分封去原封不  
遠稍便搬移原封除什物自一變賣外其房屋歸官變賣  
以助分封房舍皆限令狹小制凡分封并有王府地方  
有司正官伏乞著為令典得管理宗室有異常橫  
肆一可仍許暫行拘管二面啓知該管親郡一  
面徑自奏聞一著為令此分封所當議者不容緩  
也伏見中土邊方宗甚貧迫有曠閑其在各處宗富者  
連阡陌之田宗貧者無立鑽地皆不可不措處也伏乞  
嚴限各撫按守巡查有官民無碍田地酌量歲可收租利  
若干各給貧宗抵折祿糧若伴各令人佃種更嚴立查

勘之法除親王欽賜田十畝明外若親郡以下係  
干投獻私占者嚴勅撫按守巡查勘并諸人首告除  
前不論外以後筭該歲收租利幾何可抵折祿糧幾何查  
果無碍仍給宗室本主營業但抵折祿糧只許設足三  
分之一其二分仍支祿糧若已設足三分之一者凡多餘  
田土通行扣出給與別宗儘無別宗地方入官管理此  
利所當均者不容緩也嘗聞非心恫者迺今花生子女禁  
可混祖宗在天之靈不能無心恫者迺今花生子女禁  
止不與口糧而冒以花生抱養混玉牒者全無重罰  
豈所以嚴族類之辨慰祖考心乎若無嚴立保勘又

不過紙上虛文微隱難知誰能敵怨伏乞 申議除保勘  
舊規已行外今後責任 親郡通行嚴禁乞 宗室及本  
家宮眷親屬牧生等婦知情者各赴該管 親郡并官府  
衙門舉首舉首之人行布政司或本府縣官合賞銀五十  
兩或三十兩若已汙混 玉牒者所犯 宗室撫按奏  
請定行熱劑此 天潢所當辨者不容緩也此三者皆自  
世經久之計雖非奇論實可必行儻當事者以遠慮為心  
庶幾或以一得可採議者又謂宜依 國初遼韓伊岷肅  
諸府之制祿米皆二千石 郡王遙戚又謂漢宋得應制  
舉及工商各治生為兩便此二者雖經具題臣等未容輕

議但窮則思變變則思通苟不措處久益難圖其謀國者  
重加留意仰惟 皇上憐惻貧宗 勅下該部查覆務申  
嚴宗學之法刻期創建定議經久之計責在必行專乞  
特賜璽書與各該 親郡王府獎諭推祿宗學尚義睦宗  
凡事體應責地方撫按有司各官者俱限文書到日半年  
一年奏報此 宗藩所當計處者一也 國家定都燕  
去邊咫尺邊事振則安邊事壞則危茲欲大振邊計非選  
練將士不可欲結士心非優先邊餉不可先年邊餉之法  
藉商人中益屯田於邊商利而官亦利今則取給 內帑  
邊屯廢而塩課月增商困而官愈困焉去歲仰遵 明諭

廷議籌邊中重理塩法之一策特設屯塩大臣選用才望  
蓋誠有見於此而思為救急之計矣伏考 廷議有曰奏  
請 簡用俾之清理因以興屯田之利裕塞下之民此專  
為塞下非為內地也迺昨 欽遣大臣一往江北一往江  
南一往河東等處往江北者兼理山東河南等處屯田往  
江南者兼理浙江湖廣雲貴等處屯田往河東者兼理四  
川等處屯田是內地在所重而塞下反在所畧夫屯田塩  
法相為表裏專以塞下屯田言也若內地之屯田原與塩  
法無相干與緣內地省直屯田自有省直專責以經理則  
有巡撫以專管則有分守屯田等道以查覈虛實則有巡



按御史封疆既濶事體亦殊今徧以一六臣兼統之豈惟  
巡歷之難周亦且查訪之不及不過行文各該地方添一  
造冊繳報而已今仍宜責在該部申明事體專責各省巡  
撫與分守屯田道以下等官各務實修屯政嚴立舉劾外  
而昨者 欽遣大臣請悉罷兼山東河南浙江湖廣雲貴  
四川等處屯田事務只宜各分搭九邊屯塩地方管理俾  
各清理塩法外專意興復塞下屯田如是而後仰答 聖  
明不負初議何者塩法清理一巡塩御史稍加久任可責  
成之若三大臣則專為清塩法於內而因以復屯塩於外  
苟為不然甚非議 遣之初意以慰中外人心之屬望者

但九邊分搭管理或謂以遠近分搭則江南鹽法即宜經理  
前遼保定等處屯鹽江北鹽法即宜經理宣大山西等  
處屯鹽河東鹽法即宜經理延寧甘肅屯鹽或謂宜以事  
體相關分搭則又宜查酌屯鹽事例凡商人報中於某邊  
即支鹽於內地某處者今大臣清理內地某處鹽法即宜  
管理某邊屯田因各商支鹽報中地方以為大臣分搭  
管理庶內外相關事體亦便若謂鹽法清理稍易屯鹽興  
復甚難殊不知大臣設心惟思利國有利於國不以其難  
而遂委之無利於國不以其易而苟為之今三大臣之  
遣專欲復邊商之屯中也議其難者不過曰內帑旦夕

給邊專藉鹽引折色一旦赴邊報中則在邊尚未得本色之利而在內已先乏給發邊餉之資不知利不可以驟興法莫良於遠慮久遠之計興復屯塩為最即在目前酌處盈縮有方何者凡在內塩額初年以十分為率宜令八分仍納折色二分赴邊庶在內折色尚多在邊脩復以漸其赴邊商人必令厚利漸使樂趨待邊屯大興本色果賤每年漸加以漸可多復焉若謂虜犯非時邊屯難種今在邊屯軍非赤子耶果如所言邊塞將不保矣得塩商而邊屯愈固虜犯愈難但今屯塩大臣必宜令兼領修築墩堡勅書事務俾屯軍塩戶墩堡可觀一應事宜聽大臣悉

措處惟當事者責而成之苟利社稷誠非久任不可所  
遣大臣二考三考累有勞績懇乞倍加恩蔭特獎即本  
任漸進尚書宮保之職俟後在內正卿員缺仍內補又  
任以酬其勞統乞皇上加念籌邊大計勅下該部查  
議欽遣三大臣專職責令各兼邊鎮也塩重務久任考  
成必期興復祖宗良法庶邊儲不匱而官商軍民皆利  
此屯塩之當計處者二也伏讀易曰何以守位曰人何以  
聚人曰財是天子所以聚人民守天位所需於財用者至  
急也今者府庫空虛百姓窮困則民不可聚矣不可聚豈  
特為民患已哉言及至此良可寒心將欲蠲稅以裕民而

度支無餘歲之計將欲取民以足國而百姓有離畔之憂  
議者乃遂括天下府庫之餘以充目前匱乏之用殊不知  
府庫不遺錙銖甚非地方之福萬一變生不測官民將束  
手待斃矣今宜酌量停止各處府庫搜括外其所以為急  
救之策者惟在責成乎守令焉語曰百姓足君孰與不足  
邇者百姓之不足實守令之不良致之也近年多慮守令  
非才立為卓異勸獎綜覈名實失策尤甚自卓異之名出  
而守令之職怠矣何者天下人材不相遠甚今以其之才  
為異而彼不以異稱者在賢智之士將感慨俗論而少懈  
其心彼不賢之徒必希覬他途以嘗求其進雖中有實可

稱誦者置之薦列誰曰不宜一立此名實緣掩過之輩實  
多飾詐匿情之風互起則官風愈偽而吏治漸虛恒早累  
之名誤之也至於上下成風共棄奉承太過故守令奔走  
無虛日一以能稱即致上司委用故州縣正官多差遣茲  
欲大振吏治須罷卓異空名其迎送奉承與正官差委務  
查近題事例嚴立禁革違者定行參黜一二示戒如是則  
守令不緣虛名以亂實心不緣迎差委用以耗精力然後  
各府州縣庶幾乎有實效矣夫政在養民義先足國所謂  
實政者救今日之匱乏是也嘗聞守令有五事曰治民生  
計也清民賦役也通民財用也興民禮教也防民暴亂也

五者皆實政而簿書詞訟等不與焉興禮教則倡德行重鄉約防暴亂則練鄉兵嚴保甲此二者於匱乏一救之後賢守令自能力行之廼今救民匱乏則莫要於生養賦役與財用之三事者伏見近來守令每借口於撫字云自拙於催科臣等竊謂欲撫百姓自有惠政原不係催科之拙與不拙也所謂惠政必使嗷嗷赤子各遂生計或開墾築鑿或勸農賑饑或蠶桑或樹畜或商賈或工或作或山澤興利凡一應有生計可措者因地便民得所欲焉曰治民生計者蓋如此至若今之催科原有額數催科云拙徒不遇縱批頭攬戶之侵欺長猾胥積棍之瞞隱滋奸頑官

之拖捱而小民不蒙惠也自非精敏通才輒於錢穀算著  
其要弊孔莫究其原要必嚴責府縣清查考覈凡見徵錢  
糧除災傷蠲免外設法追完逋負錢糧除遠年恩赦外其  
近年侵欺瞞隱拖捱者盡數查出其則呈請上司追究如  
情節重大並許奏聞有錢糧不完不清者自州縣以上  
至分守管糧等官照例不得轉陞離任如不完不清至五  
分七分以上者戶部歲終照例查叅降黜蓋賦有常經乃  
所以足國惟徭役輕減實可以便民曰清民賦役者蓋如  
此廼若通民財用者蓋今民之困窮極矣錢法通行於民  
最便今不但南方未有行者即 輦轂之下且阻格焉臣



等伏思官以錢為稅則民未有不以錢為用者其在京須  
要責令 崇文門查照舊法以錢為稅外凡各衙門納官  
用皆須額定半銀半錢又必通行南北用錢地方凡係存  
留本處納官官用銀兩並額定半銀半錢若素不行錢地  
方限文書到日聽撫按官議處有能倡率錢法通行者許  
撫按特薦重陞獎勵儻官有阻撓並令在京巡城御史及  
內外巡按科道等官叅奏但錢之為用每銀一分只額限  
換用嘉靖通寶六文其前代舊錢皆視往時貴賤用七分  
之一庶錢不過賤民皆樂用嚴立諭禁不許故違有故違  
者當即重治更宜申重鑄錢之令西京工部添設鑄錢仍

乞行令各省撫按轉行布政司各特設鑄錢一局委官造  
鑄歲鑄若干存留該處府庫歲終奏報所鑄之錢例鑄  
大明通寶四字以便通用嚴行天下每銀一分亦只用六  
文夫錢法通則民困可蘇民困蘇則國用可裕曰通民財  
用者蓋如此似此三者惟係撫按嚴責守令以上各官行  
之而撫按舉劾不必造飾文辭虛稱德譽只宜直書曰養  
民生計能治幾分不治幾分賦役能清幾分不清幾分財  
用能通幾分不通幾分以至興禮教防暴亂俱如此類據  
事直書但失舉者必連坐妄劾者必降罰連坐降罰先後  
已經題 准而當道並未舉行此後撫按舉劾不得雷同

若有互相朦朧聽部院科道不時查訪叅劾庶幾連坐可行降罰無隱凡此無非嚴飭吏治裕國保民之計伏乞勅下該部查議務停止奏薦卓異之名申嚴迎送委用之禁責成保民足國之計申明連坐降罰并舉劾不用文字直書其事之條至如錢糧違欠不許離任以錢為稅及申重鑄錢之令一一乞勅戶部嚴切議行之各該省直遠近俱要限期奏報此民窮國匱之當計處者三也凡此三事最為拯救匱乏中要務遭值明聖躬節儉以先天下尤為救民恤匱之本焉嘗伏讀聖詔明旨有曰朕加意節省又曰朕正供之外未嘗妄費分毫大哉

聖謨臣民懽動然伏欲或生於復盛儉德易照於有終懇  
乞我 皇上仍賜加意臣等待罪該科慮懷經久敬獻嘉  
莢之悃少紓葵藿之誠題石三事誠不足以察微言之未  
必其能盡義不取於和衆而盡言之未必其遽行仰賴

皇上念宗藩之至意思以固未然之防懷遠慮之至慮永  
以消脫巾之患計民窮國困之已甚務以冀聚人守位之  
謀肯在當事嚴議實行經書稽處於先稽者奏報於後力  
挽之必勝身任之弗辭在 皇上遂親親仁民之心朝  
廷定安內懷外之望不惟艱難廣乏之已濟而且久安長  
治之可圖矣 宗社幸甚中外生靈幸甚

勤聖學勵臣工以成治道疏

何維栢

臣聞臣盡心為國當以帝王之道事其君君盡心為民必  
以帝王之治責諸己蓋帝王之治本諸道帝王之道本諸  
心帝王之心本諸學帝王之學本於上下交而後成臣諦  
觀古昔盛時君臣非自能神聖也其曰勅天之命惟時惟  
幾君以此責難於其臣曰念哉率作興事慎乃憲欽哉屢  
省乃成欽哉臣以此責難於其君至於成湯則有若伊尹  
太甲有若保衡太戊有若伊陟祖乙則有若巫賢武丁則  
有若其暨文武則有若呂散成康則有若周召上下君臣  
交相儆戒不敢荒寧共成此學以臻大道運諸心以達於

政當是時內則百揆四岳外則州牧侯伯莫不同心一德以欽厥職百工庶政惟和六府三事允治德普天下聲施後世自時厥後教弛道湮人心陷溺君不知所以盡君道臣不知所以盡臣道徒以智術相事使功利相征逐挾法制以把持天下而籠絡斯民其相與有為者又不過隨世低昂聲慮於章程法守之末以致力於補偏救弊之方所謂修己治人之理天德王道之要不復講求其間英君如漢文宋仁有可學願治之資而不遇其臣聖賢如孔孟周程有好學輔治之實而不遇其君君不遇其臣則不能以成其學而進之治臣不遇其君則不能以行其學以濟夫時自

漢迄今道汗治陋極矣肆惟我皇上淵穆溫文寬仁恭  
儉嗣服太寶敬承先帝遺詔以推廣德孝信任輔臣  
以幹旋世道日就月將遜志時敏結駢戒佚遊罔失矩矱法  
行近習教肅宮闈恩威出自淵衷取舍裁于宸鑑  
納諫從言懋昭帝王之度謙虛弘重允裕聖學之基大  
小臣工夙夜祗承三公輔政協德和衷卿士大夫靖共法  
守衆正盈朝茲邪斂跡上下際遇之隆時運昌泰之  
會二千餘年實所曠睹敬而守之帝王事業可坐而致然  
臣竊慮之難得者時保時者幾察幾者學蓋天命無常理  
亂安危相為倚伏今雖時泰運昌然幾微謹畏之不存則

怠荒之所自起上下倣戒之不一則變故之所由生况人  
主一心攻之者衆喜怒哀惡之微用舍予奪之機端人正  
士視之以進退其身壬人儉夫伺之以作止其惡世道汙  
隆國家興替所由繫不可不慎故臣敢以交修進學之說  
進復列君道臣道今日所當盡之實以告 陛下然臣所  
謂學者非有異論不過自 陛下之心與群臣之心求之  
而自得之耳 陛下之心即堯舜禹湯文武成康之  
心群臣之心即臯鼐益稷伊傅周召之心篤學以存心因  
心以達政自身而家而國而天下唐虞三代之治可運諸  
掌伏望 聖明詳鑒臣言當以帝王之治自任而責難於



群臣群臣當以帝王之道事上而責難於陛下上下交  
修共成德業則世道業甚一日盡君道人君一心萬化  
本原君心正則天下治而皇國長久君心不正則天下亂  
而天祿永終故曰與治同道罔不興與亂同事罔不亡昔  
者殷高宗宅憂三祀既免喪弗言群臣諫曰天子惟君萬  
邦百官承式王言惟作命不言臣下罔攸翼令高宗悅而  
言乃命傳說曰爾惟訓于朕志爾交修予罔予棄予惟克  
邁乃訓於是學于古訓道積于厥躬惟說式克欽承旁招  
俊乂列于庶位股肱惟人良臣惟聖故四海之內咸仰高  
宗之德而享國五十有九年稱為盛治陛下諒陰不言

恭默思道同符高宗茲者先帝服除即吉正可言乃雍  
之日伏望陛下鑒高宗允懷于茲之心及今與諸大臣  
言每日視朝之後請御便殿宣召元老講讀近臣  
咨論經史道理以為政治本源間召九卿各衙門大臣  
問以職掌責令奏封凡有嘉謀嘉猷悉以入告及於中  
外群臣有學術純正德行老成堪畀啟沃者舉十數人或  
隨時召見或輪次入直朝夕納誨相與講求帝王之心  
法以達天德率由帝王之治法以弘王道陛下恭已淵  
默靜理化機則自深宮以至大庭莫非戒懼修省之  
地自旦興以至晦息一皆憂勤勵勵之時思平天下之在

繫矩則公好惡以欽厥止思喜怒中節由於慎獨則致中和以贊化育思帝王一日二日萬幾不可以太康則必如堯舜兢兢業業戒逸欲于有邦思天祿永終由於四海困窮則必如禹相告戒罔淫于佚以執厥中思后從諫則聖不可陷于酒德之愆則必如禹之惡旨酒而好善言思君臣咸有一德則必如湯之不邇聲色以協于克一思君子有大道惟命不于常則必如文王望道未見而視民如傷思王者所其無逸則必如周公之戒成王先知稼穡之艱難乃可以保文武之業而無失此數者皆君道之所當盡者臣望陛下以此責成于已仍勅下部院與諸大臣

擬議上請乞

賜裁定宣召日期毅然行之責成此學

共圖治理則協德率憲享國永年匪惟無俾高宗專美於  
有商而都俞喜起天保卷阿之盛可復見于今日伏乞

聖裁

一曰盡臣道高宗命說曰惟暨乃僚罔不同心以

匡乃辟俾率先王迪我高后以康兆民蓋人臣必以道自  
盡而後可以道事君必交修於下而後可以責成於上故  
曰后德惟臣不德惟臣臣觀由漢以來人君不能致治康  
民實由臣僚不能盡道匡正有負於君無論前代即先  
朝事可為近鑑世宗先皇帝聖智英斷是大有為使得  
賢臣同心輔德則嘉靖殷邦可致盛治顧曲學褊夫矚時

競勝黨同代異典禮固正元氣已索繼而致權顯政逢悅  
詣惑比周恣肆荼毒生靈天下蓋發笑矣晚幸 先帝悔  
心殛竄淮惡一二元輔維持幹旋而勝負消長之機亦艱  
且危我 皇上御極明明在上赫赫在下二年以來人心  
轉淑世道改觀然酷烈之餘四海困窮未甦災異竄究未  
息職思其故實原於此調元葆泰正在此時今卿大夫忠  
清敏慎守正奉公大異往昔通精神志意未孚通於上下  
法紀軌物尚睽滯於多方群邪靡已踵故襲常所督責者  
簿書職守之末而開誠布公之體未彰所計量者體貌勢  
分之常而僉謀大同之詎未協紛更劫於浮議實意衰於

彌文以調停為善而不稽其所蔽以搏擊為能而不慮其  
所終事未畫一或此是而彼非政之遠圖多朝行而夕改  
且茲回革面遇不敢肆投種于地有俟而生閃縮包藏伏  
深憂于莫測乘間抵隙隱机檻於無形慮遠察微貴於定  
志上致下澤責在同心臣伏望 陛下勅諭內閣輔臣申  
飭中外大小臣工共圖同心盡道之實每月初望 朝畢  
輔臣即出於九卿各衙門長佐會於公所廣公集思揆政  
論道將各掌職事摘取重大者質訂確當付所司施行上  
關 君德及今機務所當變通釐正者從容商議協求經  
久乃以入 告九卿各衙門之長每五日堂事畢率僚屬

于後署坐論職事當否有無忌玩比護互相救正若偏勢  
怙終及欺罔姦私即當聲責繼以懲治俾人知警畏爭赴  
事功其朔望大臣會日各屬衆多難以共聽擇公所訂同  
爲會相與講明道術辨析義利扶植綱維即心論學即學  
察政無得侈談玄虛以滋盛世感省郡之吏至自外者亦  
得預會以詢政俗在外撫按與司道郡長亦倣朔望之會  
以究軍民休戚以察官吏賢否事關 廊廟亦即以入  
聞司道郡邑之長暨乃僚屬亦倣五日之會忠告規勸節  
用愛人盡心修職有不共不恪者有常罰是使心志交孚  
於聚晤德業相勵於觀摩視履稽謀可以覘性術之邪正

治理之得失官常賢否糾激荐揚考覈黜陟咸據於此如是則大夫師長不敢逸豫而切于憂勤中外遠邇不敢欺玩而一於畏敬書曰百官修輔厥后惟明明又曰凡我有官君子欽乃攸司以公滅私民其永懷是上可以匡正君德下可以康濟民生臣言若迂實切治理伏願 陛下俯賜詳察 勅公卿大臣及時裁酌擬議上 請期在必行交脩定志興道致治所繫不細伏乞 聖裁



應 詔陳言疏

王世貞

臣伏觀隆慶二年三月 詔書內一欵朝政得失許諸人  
直言無隱欽此臣竊惟 皇上以 聖曆之資當鼎革之  
際委用良佐詢召耆碩挽國是於將非收人心於既渙大  
法小廉朝野垂謚而又肅然下 德音求讜論此誠古  
帝王之盛典臣向隅餘生猥伏草野過蒙 鴻綬復領事  
寄而夙講疾疢委頓不前長負生成銜 恩丘壑苟有一  
得敢 愛其愚伏惟 明主不遺芻蕘之微小臣遂忘刀  
祝之戒謹列為八事上 請倘以為可采 俯賜納用臣  
愚雖死之日猶生之年不勝懇切願望之至 一法

祖宗以弘聖德臣竊惟我祖宗功莫盛于太祖高  
皇帝德莫盛于孝宗敬皇帝高皇帝業由開創政多  
更始臣愚不妄瀆至于孝宗皇帝承列聖之貽範  
而不顯之深仁厚澤淪浹民志追丁今過一甲子而謳謠  
之不衰臣不佞請舉其一二以告孝宗皇帝簡素恬  
穆後宮無偏私聲豔之寵節儉敦睦後乘無徇馬趨肥之  
嗜御極十八年貢獻裁損殆盡無行幸稀簡昧爽視  
朝退御經筵咨詢治道暇則召大學士劉健李東陽  
謝遷尚書劉大夏都御史戴珊等相與講析政要較求畫  
一以故聖聰日啓萬機益練少詹事王鏊常講又王不

敢盤於游畋章有所指摘退 朝即 召中人李廣戒勗  
之曰今日講臣言殆為汝等宜自省勿貽後悔學士張元  
禎 上太極圖說亟讀之且歎曰天生斯人以開朕也中  
人為 皇后治袍 請開廣東珠池 特命內庫擇藏珠  
為之而以責中人曰若不過欲自得珠不思困吾赤子耶  
員外郎李夢陽 上疏忤 責左右 請加杖責不許曰  
若輩欲快吾一時不過成吾殺諫臣名耳凡九卿大臣不  
輕更易以年至致仕者進階 賜金績以東廣徭過糶彈  
即為溫慰聽自陳乞休以故當時大臣宿恭徇法無自私  
求避之念言官精白靖獻戒儉訐刻覈之風官府一體朝

野救寧即詩書所稱曷以加焉臣願我皇上深唯而憲  
述之或命輔臣紬繹金匱之秘于孝宗皇帝聖政略  
成一編朝夕呈覽以為聖德之助臣愚不勝惓惓  
一正殿名以尊治體臣竊惟太祖高皇帝恭行天討  
掃逐胡元登極之後名其大朝門曰奉天門殿曰奉  
天殿以至詔赦誥勅俱以奉天冠之明人主不敢  
以一人肆於民上無所徃而非奉天也軍除年中悉  
更諸門殿名成祖靖難之初明舉其罪布告天下永復  
太祖之舊先帝偶創欽敬誓新耳目未幾晏駕御史徃  
有所陳皇上不忍遽易臣竊惟圖治在乎法祖大孝貴

乎成親 皇上為上帝元子可一日而不奉繼 太祖大業可一日而遽忘伏望 肅發明詔於大朝門殿仍奉天故號以昭衆觀之重或以華蓋護身二殿左右各門存皇極殿等名以慰衆牆之思臣愚不勝快悵 一酌恩義以處 宗室臣于嘉靖二十九年遇故脩玉牒臣云自親王而下至庶人已未名者幾三萬位又二十年矣可得五萬位今 周府已近四千位 韓府亦千餘位雖竭天下之財力恐不足以供其源源之產往者聞禮部會議裁省經制臣愚越在草莽不能盡識竊以為 國家待 宗室之意往往傷於用恩其待 宗室之法往往傷於用義

夫族屬至於奉國將軍亦可已矣又復推而三其中尉以至世世不絕所謂傷於用恩者也雖其跡者皆高帝及列聖後也無罪而困之于一城而絕其仕進之路所謂傷于用義者也伏望皇上下禮部及府部大臣會議於奉國將軍諸子俱聽免其祿秩分居附近州縣廢箸之日仍照會典事例給與房價量復徭役終身使得盡力農賈其有志科目者照常肄學應試聽為南京及司府州縣等官一應宗室年至五十量與本等服色冠帶其周韓二府郡王至奉國將軍改封雲南廣西四川福建地方並給路費行抵庶幾少甦中土之民且獲安天族之

照各宗室命名俱限金木水火土字樣以致重複互犯  
創造生澁自今而後係中尉以下止從上字定名其下不  
拘何字非惟可免重複創造之苦抑亦少寓親疎之別或  
謂事體重大或謂關係典章臣竊以為及今不處十年之  
後將有不勝其繁者矣易窮則變變則通通則久唯

皇上銳然行之臣愚不勝惓惓一寬禁例以求才哲竊

惟王府親戚不得為京朝官原非祖宗甲令止是宣

德年中秦府永興王欲以女女通政使李錫子詔謂錫

見居喉舌之地不許弘治中吏部尚書屠濬與大理少卿

王輔有隙以輔係王親創為此例出輔參政鬱邑以沒

夫屠瀟修區區之小忿而使國家負猜疑宗室之咎  
狹賢才進用之途臣以為瀟非純臣也大學士楊一清先  
後建言頗有次第而新貴人張桂等謂一清有所援引  
浮言沮之迄今未復天潢流派繩繩無已屬在國親  
其麗不億即有奇謀石畫不得與廟廊之議干城腹心不  
得膺保障之托以皇上之側席思治求士草野而顧乃  
畫才於聖世甚無謂也且今宗藩之最鉅者不過以  
財自娛如江南一富室而已豈有鈎結黨與為國家憂  
如梁孝燕刺者乎伏乞下臣所言于吏部今後凡係王  
國親屬一體照常陞用京職毋得壅闕庶幾國家宏湯



蕩平平之政。宗親無戚戚具爾之歎。臣愚不勝惓惓  
一脩典章以昭國紀。臣竊惟大明會典一書。實我  
祖宗經世大法。百司庶僚奉而行之。可以傳示永永。而時  
涉變通。事多損益。先該嘉靖二十九年間修完。進呈不  
知何緣廢閣。然自三十年以後。隆慶二年以前。中間典儀  
之更革。兵制之裁定。財賦之出納。又有不容于不修者。臣  
愚欲命內閣輔臣作速更訂。進御頒行。至於法司上  
帽。天威下媚。政府以意為師。顛倒三尺。或疏辭引二  
王。而比以詐傳。令旨或出題涉風諫。而比以子罵父。或  
奉旨延遲。而比以棄毀。詔書或奏事欠實。而比以衝

突儀伏舞文弄法不可枚舉亦宜明旨禁筆著之會與  
中永以為戒臣又唯太祖實錄洪武三十一年止中間  
至永樂元年尚有關漏未載夫漢不以呂氏而廢本紀唐  
不以武氏而廢實錄何者明天下不可一日無史也臣愚  
欲下內閣諸耆碩臣考究革除年間事跡別為一書附  
之國史之末其侍講方孝孺尚書鉉殞身滅族以衛  
社稷宜鑒其吠堯之忠賜以易名之典他若尚書齊泰  
等亦要明著功罪以示勸懲其於國家治體關係非細  
臣愚不勝惓惓一推德意以昭大勸前奉隆慶元年  
詔書旌錄言事及查舉先朝大臣卹典海內士大夫欣

然加額思奮其忠力以為國家風潮一世之典無或弛  
於此或有事涉遐遠或格小有未合者臣請罄其一得  
以備採擇 高皇帝時開國諸公侯自中山開平岐陽諸  
王外功莫大于韓國公李善長頴國公傅友德宋國公馮  
勝德慶侯廖永忠善長籌撫轉餉之功不下於鄼留中問  
以嫌疑獲罪王國用辨之甚詳友德等戡定蕩闢之績遠  
過於絳灌李老牖下而時屬戡戡未蒙易名之典 文皇  
帝北伐時失律者王帥立福耳而固安侯火真等罵賊力  
戰以死其忠節激激著實錄中臣以為此諸臣者宜優加  
贈謚者也徵士吳與弼刻行追古力辭官秩其高風足以

廉頑而起懦翰林檢討陳獻章潛心聖傳化行里閭其緒  
言足以繼往而開來副使李夢陽何景明再上讜言力  
持權賄氣節足以彰明國是文章足以潤色皇猷臣  
以為數臣者宜特褒以誼者也故給事中陸粲吏部郎  
中薛惠一則上言典禮一則糾論權奸相繼謫罷中間  
粲嘗量移邑令惠則引疾乞休以故於例小有不合然其  
自節儉行何可道也臣以為此二臣者宜量予以贈者也  
大旌及于遠則潛德者思奮旌逮于下則位卑者勉修一  
舉而勵世之善備焉臣愚不勝惓惓一昭爵賞以徠異  
勲臣見先帝時復開國六主之後俱為列侯所以張大

國恩率厲士氣至隆厚也今虜無歲不犯邊國家之財  
用稍絀謂宜提空名以鼓舞之而上不為異格以待下  
不為異勲以報上斤斤守利印之故規而欲責人以撻伐  
之奇烈臣以為萬無是理且王守仁在武廟時提烏合  
一旅生縛逆瀋致之闕下而區區伯爵始見格于悍卒今  
復沮於多言大書生不諳故典謂伯爵為至重不知今世  
世稱伯者不下數十人曷不取其祖宗時鐵券校之其  
功不過下一城破一軍而止有能如王守仁者乎皇上  
幸下詔言吏兵二部會議若守仁者予之世封其高帝  
功臣如前所畧宋國公馮勝穎國公傅友德德慶侯廖永

忠亦宜并下所司講求所以中解之故取其嫡系量復封爵明告天下有能驅滅北虜大者公小者伯世世勿奪數年之間能無長平冠軍出而應詔者乎臣愚不勝惓惓一練兵實以重根本臣見節年防秋延綏固原將士萬里入衛日漸減耗為之痛心而太倉歲漕四百萬石以養疲癯無用之士為之扼腕且京師與薊邊呼吸相應臂指互使其勢與他鎮不同臣愚欲望皇上勅下兵部分委御史等官于陝西各邊不分軍丁合餘精選五千餘名以為騎士山東河南山西北直隸等處精選三千餘名浙江義烏等處精選一千餘名兩廣楚蜀土兵精選二千餘名

以為步兵仍于團營錦衣衛各官軍旗校精選一萬五千  
餘名合三萬人分為二營另委名將如戚繼光馬芳者統  
之明詔內所舉廢棄大小將官曾經戰陣者各任偏裨  
分領哨掖日逐演練嚴其賞罰一遇聲息令其協助薊遼  
總督戰守其陝西每歲入衛官兵俱從停免仍委嚴明給  
事中御史將京營京衛大小官軍悉心清查其老弱者黜  
退見闕者停補至于錦衣一衛冗食尤多尤宜酌量裁革  
歲可得漕米三四十萬石以養此一萬五千之精兵不唯  
薊鎮緩急有賴而國家隱然得居重馭輕之意昔周世  
宗宋藝祖嘗行此法兵以寢強戰無不勝臣愚不勝惓惓

仰承 德意敷求實政以永保安甯 鄭欽

臣惟 聖皇在二而天下蒙久安長治之福者致治有實  
功而用人有實效也 臣竊于言責待罪該科披閱章疏恭  
觀 皇上嘉納敷奏 訓勅臣下屢有從實舉行實心幹  
理之 諭今歲四方多寇災害異常伏蒙 聖慈加意民  
虞蠲租發賑停刑罷役優恤之 恩寧於 天地竊俯  
而思曰 若令而臣弗共是不忠也 德施而澤不究臣  
之咎也頃者家宰員缺仰荷 宸聰慎簡至公為 國之  
人以膺 眷命而臺卿闕帥實極一時之選中外臣士罔  
不聿正人之柄用憚吏治之嚴明洗心滌慮精白寅恭以



求報效不遑矣顧臣蠡測管窺何能竭涓埃於萬一然誦  
聖謨而惕念感時事而激衷思救弊以補偏敢循名以  
責實用摠一得條為六事惟 聖明垂覽焉 一曰定  
國是以正人心臣切照人才有淑慝而政事關焉政事有  
治忽而是非係焉 聖天子運 乾綱於獨斷而分庶職  
於百寮寄耳目於臺諫而總權衡於部院言官有賢不肖  
許臺諫風聞論列非私臺諫也所以廣視聽而防其壅也  
臺諫有可否下部院查覈覆奏非私部院也所以審群言  
而杜其衆也邇來爭端滋起辨評成茲效憲臣曰部臣宜斥  
邪臣亦曰憲臣宜黜一人刺之為非一人又執之為是

可乙否堅白異同建言者似出公心報復者殊涉私意所以然者良由國是未明而人心不古耳夫國是未定而欲使議論之協一是猶止嬰兒之啼而塞其口也仰惟天威震懾海宇澄清人心士習大異疇昔矣然士路已清而頽風未振法網日密而實裡罕聞弱者因循以觀堅雖國虧民苦勢迫于燃眉之急而且姑謂之徐徐強者者遂辯以飾欺雖事煩民擾明雖夫覆轍之虞而猶肆利口之喋喋任勞任怨者百無一二推奸避事者十恒八九負清修之譽或飭貌而不飭心徇破格之名或采文而不采實將欲舉之而無名則曰彼曾不附嚴氏將欲刺之而無

名則曰彼曾濡足嚴門殊擢所以待異才也而便給為能  
貪滋不檢者亦得驟登夫顯秩何以作天下之忠勤起廢  
所以濡幹濟也而桑榆景暮尺寸未酬者亦得冒獵夫崇  
階孰不以終南為捷徑撫按係外官之表率守令為生民  
之父母好惡不佛傳嘗言之愷悌君子詩嘗咏之矣徃見  
為監臨者徒以簿書督責屬吏為守令者多以深刻承望  
風旨上官喜罰贖相率剝膏削脂以快其私上官喜搏擊  
相率破家滅門以投其奸案無留牘者有矣恤民饑寒者  
誰歟不畏強禦者有矣救民疾苦者誰歟連篇累牘盈庭  
皆卓茂之才問俗觀風觸目盡凋疲之狀是何列之薦剡

者有餘而徵諸治功者不足耶抑何張湯虐政多宜于此  
時而召杜仁風不可見于今日耶近該銓司留心都邑之  
賢者請加服俸蓋出格之典激勸之機無非為生民計  
也但恐希望者或不求其實昧上意嚮目循良為俗吏  
務竣刻為丰裁則恤民適以病民盛典不為厲階乎據  
已往之積習尤將來之明鑒當此賢哲奮庸之日孜孜汲  
汲之秋苟不定畫一之章程而徒更一時勢立一法制易  
一歲月新一見聞非所以培元氣而長國脉也合無  
勅下該部俯察邇言大加振刷際盛治昌明之會酌大  
中至正之規圖治務求實濟毋侈虛文用人務揀真才毋

采虛望度德授官因官取效以靜修屬館翰而有耳目風  
紀之司者不當以緘默為持重以清謹律儒官而有錢穀  
兵甲之寄者不當以規避為老成一拔擢也必其入而在  
內足以膺柱石出而在外足以寄干城者然後舉而加之  
否則寧循資序遷可也毋使非望之福誤及匪人以速瘵  
官之誚一起用也必其功施民社為謀 國老成弘濟艱  
難係蒼生重望者然後召而致之否則寧 賜閒表宅可  
也毋使膏粱之流徒取充位以貽伴食之譏其為往行可  
嘉母以一節信全德其為樸純可議母以一青槩平生酷  
之寧其甚於貪則官居民牧有不當以慘刺為賢能上有

好而下必甚則身範物先者不當以操切為任事實意擔  
當者務救其小過雖三至之報勿疑也巧言令色者務灼  
其深姦雖衆好之中必察也再取言官論列固多風聞部  
院查覆自有公議言貴所係誼不敢容隱 聖明在上照  
臨如月明去留旌別 天鑒昭然辨訐之風殊不可長也  
合無查照題 准事例除大臣引過目陳以俟 聖裁餘  
經論列者不問覈實與否宜杜門省愆聽該部從公議覆  
毋許輒行奏辨以滋兢端如此則道揆立而衆志孚法守  
嚴而士風正所以興道致理者可期實效矣 二曰慎陞  
遷以一事權臣切照全才不可多得善治必先久任我

國朝稽古建官內設臺部寺外設督撫藩臬凡以國  
與民之責寄之也節經議覆久任之法固宜斷在必行矣  
然卒不免陞遷之太驟者得非沿習久而拘攣深乎是故  
內而卿寺或為人那缺或遇缺推人遠不及其近不踰月  
一歲數遷者有之旬日再轉者有之外而督撫或以東易  
西或自外補內趨迎之枕未安報代之檄忽至靖盜之戈  
甫息內庭之擢隨臨以奉藩臬之官資徼稍深者陞改  
多憑於途次往來空費於將迎果為國平煖席未遑胡  
一籌之速展易為民乎息肩不暇奚四體之能舒今之議  
者不過曰高位常苦於乏人下寮每嗟於白首他邦非此

人不可外任不容以久勞維時與勢不得不然而不知率  
土莫非生靈顧彼不宜失此功化難責俄頃有成必待三  
年若一處未寧忽遷他處一官方接復改他官遍歷尊崇  
一人之榮耀得美於朝家何賴焉昔大禹治水八年於  
外必俟錫圭告成始有百揆之命先年巡撫周忱輩皆歷  
任一二十載當是時豈故疎而遠之而廟堂之上豈無  
一京缺可推者乎孟軻氏云進賢如不得已將使卑踰尊  
疎踰戚可不慎歟書曰臣為上為德為下為民其難其慎  
合無今後用人必加慎重毋輕授受卿寺遇有員缺除資  
望相應者照常推補外餘歷俸未久者亟暫虛以待如有



正則副可虛有左則右可虛縱弗獲已欲推其人必俟一  
年二載之後方可及之母復驟遷數四以厭耳目督撫正  
當有事安攘方殷者必俟三載之後考有成績即擢置  
內庭如事方有緒未成民方呻吟未安者縱使久勞於外  
或增以秩或加以俸毋復他改別遷以失觀望各省兩司  
果係資深望重即酌道里伊邇或見任地方就便超遷查  
照前任禮科左給事中鄧楚望所議毋使朝秦暮越不勝  
絡繹之勞再照事勢每內逸而外勞人情恒厭達而喜速  
臣切見邊方撫臣有缺 廟堂會推甚難其人及不踰時  
被推者方抵任向之不堪推者又公然列為上卿矣此

惑新精養拙者多而殫力程能者寡也合無今後通計歷  
任之勞逸為敘遷之盈縮如終身安閑坐鎮者不使超越  
於折衝禦侮者之上如此則人得安心職業而無觖望之  
私實為民不蒙速化之念所以熙載亮工者可期實效  
矣 三、禁改調以肅臣紀臣切照改調之弊與久任正  
相矛盾欲久任而不禁改調是猶却步而求前也今內外  
官員係為事為民之最切者莫如部屬守令夫六部司屬  
職守各為至要官制原有定序可言繁簡而不可論低昂  
也往往有假公濟私更調靡常者謂吏部進退人才不宜  
輕授必擇有才望者而調之似矣其餘各部亦皆東更西

改果何所擇而取之歟謂兵部職司軍旅不宜徑選必簡  
有韜畧者而調之似美然既調之後又復出此入彼豈一  
司馬尤不足盡其才歟况錢穀國脉所關刑獄民命所  
係工虞孰非急務而組豆軍旅之事亦非可卒辦此部急  
於得人則彼部獨可廢事平應調者既稱有望則未調者  
豈皆不才乎昔顏閔命世之才所長各止一科稷契名世  
之佐終身惟司一事何者不如是則無以安其位而行其  
志也夫積習沾固非一日然乃今清明之時不為釐正恐  
公心反嫖私意將為他日鑽刺者啓倖門覬覦者立赤幟  
耳縣之有令最號親民自責牧宰官之文暫而民之休戚

因之也往往有到任未幾改調繁難者即如臣邑二年內  
兩令皆以調去以致邑政廢弛盜賊充斥一邑如此他可  
類推矣若云他邑多事則此邦方且噉噉若云才力有餘  
則薦仕亦宜綽綽矧令一調而五害乘之官無固志而假  
脫頽以要名者一也代未及至而委權官以肆劫者二也  
上無定令吏胥緣賞為姦者三也民無恒心姦究乘機竊  
發者四也巧僧之徒或倖其脫去而恣漁獵者五也凡此  
五害皆臣愚所目擊而身親者也議者欲附合已意援疾  
為喻謂疾之未甚庸醫可調危急之症非盧扁不可治所  
以為彼者則善矣而不知此方元氣就虛癰成毒一旦

潰決莫可救藥雖急求盧扁亦何及乎夫十室之邑必有  
民社武城雖小不廢弦歌只今邑里蕭條凋瘵皆是長官  
數易甚非百姓之福也合無今後寧慎簡於始無輕改於  
終竊為官擇人毋為人擇官六部司屬一體重視除吏兵  
已經題准非才德俱優器量素諳者不得擅改二部其  
各部員缺新選遵照舊規余即於內外相應衙門推補必  
遴訪而後授之優文學者升之禮部善會計者委之錢穀  
以司刑獄必刑名之熟也以職工虞必綜理之周也如其  
才果優長功能茂著者即舉本部久任而擢用之如近日  
戶部郎中魏學曾兵部郎中張憲奉事例任之不為不

而待之不為不隆矣何必徇龍鑒之計以啓奔競之端乎  
至於縣令初補必視才力優劣為邑里繁簡既任之後果  
係不及者方准改調簡僻以示曲全其地方稱便者毋復  
改調繁名邑以致備累再照官署內外爵無崇卑每遇推  
陞京官恒喜遲而外任恒賞速有何哉蓋京官論俸不論  
資外官論資不論俸此人情所以重內而輕外也合無外  
任如郡守等官查照京官推陞事例歷俸三年者陞以憲  
副五年六年者竟陞叅政廉使積而至於九年者竟陞方  
伯巡撫之秩如此則德溥於委任之專績成於行政之久  
所以足國恤民者可期實矣四曰專責成以省添

設臣切照張官置吏不惟逸掾惟以治民也民之聚而為盜反側不靖豈得已哉蓋其始也必有以激之其既也又有以縱之其終也勢之所迫不極不止揆厥所自其過在官而不在民也間者災害及民臻盜賊蜂起劫庫殺官攻城破邑上損國威下貽民感節該失事地方當事者不追求致弊之由救弊之實奉旨議善後之策不曰增縣治添職官則曰加兵備復總督近該聞廣又各有兵後設縣之請焉臣每見此不勝慨然意夫官事不攝宣聖所幾冗官之議職者先之今天下海集郡縣各有分上正佐寮屬各有分民糧儲兵備守巡等道各有分職又有重臣以彈壓

之按院以監察之謹備禦則有都司衛所等職防險要則有總兵遊守等官一事必設一官一方必轄一職揆文奮武拱布星列可謂十羊九牧無復加矣奈何位民三者賢智則勤勞素積以獵薦剋不自則剝民脂膏以充囊橐無以賦繁後重民失恒業饑寒迫虜不能自保弄兵潢池嘯聚山谷癰潰一旦束手莫支要皆官之失職非無官也即如徽婺礦賊生發已數十年各該守土之官閉目搔手累不究禁延至劫人燬宅民急而求籲控訴於長官為長官者且曰有上司在不暇及此即一處而他可知矣養虎貽患坐以待斃乃汲汲於添官設邑豈理也哉先因財誅民



窮議輩冗員以省靡費如川貴總督蘇常叅政廣德兵備  
清浦縣治其始皆添設也一經裁革痛快不勝今歲徽衢  
兵備之添設復踵廣德故事非浙江撫按為之調停歸併  
則不一二年又將有裁減之議矣夫地里遼曠人情強悍  
易發難制亦必有所當增設者但不揆之地方九經失事  
一槩陳請為苟且推諉計切恐殘喘之區瘡痍之後不  
務休養生息而供億動作靡費百出將見擾害愈增而顛  
連愈甚矣合無勅下該部務加參酌見今陳請者必  
揆諸地里之宜民情之便委係嚙臠難制萬端獲已者然  
後曲從所議毋任彼目前之謀以貽後累其已經添設如

川湖等處客或有無事地方官多所當辦併者行令量照  
浙中事例哀多益寡以圖官民兩便仍通行各省直撫按  
官申飭各該司道郡縣念所在之多虞臨關之疾苦為  
守令者饑溺猶已視民如傷田野荒蕪何以闢之流離逃  
竄何以復之風俗薄惡何以挽回之民情頑悍何以馴服  
之刑罰中教化勿恃守身之濯濯而險刻以矜能催科中  
撫字勿視待哺之嗷嗷而苛併以塞責保甲毋襲故套而  
必求寓兵於農以彌盜於未形積穀毋飾虛文而必求有  
備無患以救災於既至萬一水旱為災積貯無備者必追  
求舊欠之官及地方有警不能早見預防者尤根極貽害

之原一併重加斥治雖已經陞遷者亦要嚴行提究不得輕宥佐貳等官督糧管糧清軍巡捕管馬理刑原有專職嚴加切責各求實效以不失國朝設官之意毋許舍本職營別差以妨正務兩司如兵道務率所屬練卒伍時簡教以戒不虞守巡時行郊陌省耕欵問疾苦以察撫按所不周補守令所不逮毋或自求暇逸動委有司徒了文移撫按出巡各照所屬職守悉心考核其為恤民而稱職其為殃民而不職其為庶能其為貪酷必訪其實跡可據者定為舉刺毋或尊大其體面自目於匪人惟奔走承順之為恭如此則官不加多而自無愆事之患民免紛擾而

允抵輯寧之休所以極冠章也者可期實效矣 五日嚴  
任代以圖安攘臣切照忠於事 君者不謀其利急於為  
國者不顧其家我 國朝如意安攘凡邊腹臣鎮專設督  
撫重臣握樞控要雄然保障兵馬之強荷糧餉之盈縮地  
方之安危所關係誠重且大也往多冒濫邊銀侵剋糧餉  
屢經舉劾及被 命赴任者相率遲延致遭論劾臣切謂  
撫臣所以仰荷 厚恩俯膺重寄者何如而可以貪肆怠  
緩若此耶夫禮君言不宿於家督撫職專聞外一受 勅  
命即有地方之責痼瘼休戚身且不有况可枉道回家以  
遂其從容宴豫之私耶先經題 准凡總督巡撫不拘邊

方腹衷如遇陞遷事故俱候交代畢日方許離任非徒使  
之假宴會之歡以叙新舊之雅也蓋以重大責任非可輕  
按錢糧兵馬安危利病躬相授受俾舊政不隳於垂成新  
任藉有所持循耳頻年陞調不常遷轉靡定等開府如傳  
舍視勅命如弁髦為新任者領勅私歸絡繹遷延其  
中固有情不容已者而要之私便身圖問田卜宅侈炫耀  
於故鄉者恒多也彼舊任之人或京擢行或調繁去或貪  
酷罷或守制歸羈候動逾半載使久任皆陞調者猶知自  
檢以避物議而罷廢休致者亦坐以待繼焉則將有不肖  
之徒貪得無厭惟恐代者之不遲此方駐節而彼已滿載

矣如江西巡撫某久坐贛信而漏索前件數月何啻萬金  
寧曰甘棠遺愛延綏巡撫某侵剋餉銀而大誤邊事覆勘  
俱有實跡豈云琴鶴清風此外又有事變無容少待至情  
不忍久淹者如之何而可遲且緩也邇來新舊相接彼此  
交代不過盛張筵宴備陳儀物酬酢交惟而已邇有賊私  
數萬如其其等所為者固常襲故玩愒因循及經查盤賊  
跡暴露雖奉 旨追賠在不肖者固無足惜然堂堂都憲  
而下同於僕隸於體統不其褻乎自今督撫諸臣一時多  
係新任尤宜申明法制嚴示期限深鑒往轍著為定例伏  
乞 天語叮嚀申飭各該新任撫臣不問邊腹地方俱刻

期就道着速赴任並不許枉道回家稽遲歲月交代之日  
即將前任動支過錢糧給散過軍餉或修築過牆堡或練  
補過軍伍田地有無荒蕪曾荒無者有無開闢若干人民  
有無逃竄曾逃竄者有無招撫若干賦稅有無拖欠曾通  
欠者有無徵完若干盜賊有無生發曾生發者作何撫剿  
地方有無災傷曾災傷者作何賑恤一應承接事宜具悉  
交割舊任復命新任報代逐一開款具奏如仍蹈故  
習枉道稽遲及從事虛文舉行不實者容該科訪聞叅究  
如舊任官有冒破侵欺等弊新任官隱護不行稽考聽巡  
按官查出一併叅奏片罰如此則視國猶家而督責

有專功急功忘私而無綏無遺力所以安內攘外者可期  
實效矣。六曰革風蠹以振漕絀臣切照行法者貴求其  
本革弊者務濟其源凡一應漕運事宜先該都給事中張  
憲臣建議已經題覆臣無容復贅今閱漕司條奏首以根  
極弊源歸咎有司之不守漕規不遵 明旨而謂謀謀於  
運官之貪取常例運軍之恣肆刁索為不揣其本而齊其  
末臣切謂糧米粗濕及舡到世糧誠當責備有司而官軍  
之刁蹬需索作弊營營壞漕之本源也何者蓋漕運之  
出不過曰進謀漂流掛欠而壞漕之弊則莫如運官之科  
索與運軍之缺少耳臣查得議單內開稱凡逃故軍士各



該衛所不行擒捕者聽各該委官比照京操官軍該班不到事例事發察究又稱凡把總等官索要運軍常例科派銀兩照銀數多寡問罪降級有差重者發邊衛充軍及侵剋運軍月糧行糧多索紅料等項銀兩查有贓私俱照監守自盜事例刺配發落是立法非不嚴防姦非不密也柰何因循日久法紀廢弛總兵某狡詐沽名殊無任事之實參將其持身蕪謹而之通敏之才其各把總之設所以約束一總督計備運也率皆實錄為姦恣行科索每幫船一隻索銀一兩名曰幫錢索米一石名曰食米沿途派搭私貨責令各船包認發賣名曰貨錢抵京交糧後責令旗軍

出銀額車裝載回南名曰車錢種種名色頭會年欵非特  
江西把總某為然也如江南上江把總某先索新安衛指  
揮某幫銀一百二十五兩及指揮某為事某代運又勒銀  
八十兩到京尤復索致本官揭債完糧即一二總而餘可  
知矣夫把總貪肆為姦故官旗通同作弊人咸以武弁庸  
流置之弗齒而不知關係國儲為害實大也舊例每船  
一隻旗軍十人衛軍先僅撥運次及別差今各衛所官多  
將有田正軍膏腴而以無田餘丁補數其行月二糧又皆  
官旗冒領以充使費併扣還逃年補納漂流之數軍丁苦  
累情願幫貼旗甲不肯赴軍冊載空名軍無實數每船正

軍多不過三四人過淮之時顧資外班棍徒撐駕而劫掠偷盜之患乘之利害休戚全不相關稍遇風濤輒至漂流乃希圖羨餘銀兩為之抵補抵補不足遂成掛欠凡此夙蠹可獨歸咎於有司乎此運官之貪肆運軍之缺少臣切謂其為壞漕之本源也目今督漕正值初任總兵又當更置合無勅下該部會推才守俱優實心任事者以代其任總督相與會同深鑒夙蠹痛加剗革先將一二貪肆者究治以警其餘於各把總嚴加懲戒如蹈前弊不時叅究新運在卽速行各撫按責令各該衛所掌印官缺少運軍先照例住支俸糧即將各項下精壯軍丁通融撥補務足

額數方許開俸勒限先期造冊解赴漕運衙門候糧船過  
淮之日漕司照冊查點各軍有無足額是否精壯真正軍  
丁如有不足比照京操該班不到分數事例將掌印官罰  
降如復虛捏詭名碩覓棍徒者併行叅提重究月糧務要  
親給安家行糧如數給散各軍毋許官旗仍前侵尅違者  
叅究如例再照掛欠糧米通年沿襲不常巡捦不行完納  
各把總又復冒領新運殊非 國法合照 勅下總督倉  
場衙門即查覓年掛欠之數將各把總嚴行叅問輕則罰  
俸重則降級令其戴罪領運必俟賠補完日方許開俸復  
職如此則紀法嚴而風蠹以清漕綱振而轉輸有賴所以

裕儲足食者可期實效矣夫以上六事極知為不輕之論  
迂遠之談然螢光無補於日月而大造弗棄乎芻蕘  
是以不揣顛愚冒昧瑣瀆伏乞 聖慈 俯賜採納  
勅下該司參酌可否見諸施行或可以為循名責實久安  
長治之一助也臣不勝戰慄祈懇之至

初政第二劄疏

霍韜

臣聞漢文帝入蒞大統首問每歲決獄幾何每歲錢穀出入幾何陳平對曰有主者司馬光謂平所對為非非也大  
臣惟擇夫主刑獄錢穀者而已貴大臣知刑獄錢穀之數  
非也或者又云文帝非所宜問亦非也蓋知刑獄之數可  
以觀風化矣知錢穀之數可以知經費矣此漢文帝之問  
實人君初政之首務也臣願陛下推廣此問可乎如  
蒙首召戶部問之曰祖宗朝歲計賦稅所入幾何各省存  
留幾何內府需費幾何百官廩糧幾何軍士糧餉幾何  
三邊供億幾何藩封祿米幾何內官月糧幾何較之今

日歲計所增幾何所減幾何然後從而思之曰賦稅所入  
猶夫昔也所費所出不有倍於昔者乎年代愈深流弊愈  
極蓋有以處之乎次召吏部問之曰祖宗朝外任百官  
幾何京任百官幾何薦舉幾何科貢幾何雜流幾何較之  
今日冗員所增幾何衙門添設幾何然後從而思之曰  
輿圖政事猶夫昔也冗員冗食不有加於昔乎官添弊冗  
政紛多門蓋有以處之乎次召兵部問之曰祖宗朝天  
下軍職幾何京衛帶俸幾何外衛帶俸幾何天下軍士幾  
何在京勇士幾何校尉幾何較之今日所增幾何所減  
幾何虛名無實勢豪包辦月糧幾何然後從而思之曰天

不疆圉猶夫昔也冗員冗兵不有倍於昔者乎愈久愈冗  
愈冗愈極糧食無措蓋有以處之乎次召禮部問之曰  
祖宗朝天下親藩幾何鎮國奉國將軍中尉幾何儀賓  
幾何內臣幾何較之今日所增幾何所減幾何然後從  
而思之曰歲計賦入猶夫昔也宗藩內宦不有倍於昔  
者乎勢窮則變變則通通則久蓋有以處之乎次召工部  
問之曰祖宗朝歲計物料所入幾何恒年修理幾何  
上用所需幾何各監局所需幾何軍器修理幾何工匠幾  
何柴炭幾何較之今日所增幾何所減幾何然後從而  
思之曰天下課料猶夫昔也浮費不經不有倍於昔者乎



繁費日滋帑藏日竭天下日困國計日艱蓋有以處之乎  
次召刑部問之曰祖宗朝歲決大辟幾何較之今日  
天下決大辟幾何情真著監幾何可疑見監幾何然後從  
而思之曰好生惡死人心猶夫昔也嗜利忘死不有倍於  
昔者乎經奏屢決有此數也敲推冤死不有萬於此者乎  
無恒產斯無恒心刑酷民寃國本攸係蓋有以處之乎是  
故天下一大家也處天下猶夫處家也今夫千金之家一  
人身之其百費饒洽也固宜再世有五人焉則為二百金  
之家矣以二百金之家復圖千金之費不日就窮促已乎  
雖然二百金之家儉以圖存其不墜先業也亦宜再世再

有工人馬則為四十金之家矣以四十金之家復圖千金之其不立墜先業已乎雖然四十金之家猶可擴之為二百金之家也二百金之家猶可擴之為千金之家也存乎人者也天下大家不再擴焉者也限於勢者也我祖宗創業之初猶夫億萬金之家也宗藩之分封猶夫子孫也官猶夫工作也內臣猶夫臧獲也軍士猶如守家之大也歲費供億猶夫家之調度也率是數者皆如祖宗之權猶勢窮弊生尚宜思所以救夫末流之患以適夫時宜之制柰之何年積月冗於是數者不知幾倍於祖宗之舊浮費百出日益日甚不知幾倍於祖宗之舊是猶

承千金之後者不知其已落二百金之家矣復忘意夫千金之費也若之何其不窮乎 陛下思而及此尚早圖之俾內臣外臣協心同憂兢業十年乃克有濟失今不圖後無及矣今縱未大更張 陛下只時念及此或命六部開具太數揭帖朝夕觀覽則所以恐懼撙節之意自不能已矣內臣勲戚亦使之盡心思慮以防夫日後之患以紓夫目前之急 國家得宏久之圖內臣亦享綿長之福 陛下亦日慎一日心由此正慾由此窒天理常存邪妄退聽克復禮之力由此益堅祈天永命之道由此馴致潛消默之中自致夫 聖德 神功之盛矣

預陳用人理財大要疏

張鹵

近該吏科都給事中鄭大經題又該吏部覆題乞 勅兩  
京九卿堂上科道及在外撫按諸臣限一月以裏各以前  
項事宜據所見聞開陳奏 進奉 聖旨是欽此臣惟今  
天下事至急且大莫先此二者今天下議論徒多而無裨  
實效亦莫先此二者茲 聖心甚盛舉矣竊恐 獻言者  
猶不皆當實不免仍落故套且容有基禍流毒不但徒仍  
故套而已蓋古之用人惟隨時隨事隨地隨才舉一事無  
非求才之方舉一世無非求才之地故垂綸者一日而惕  
卜扣角者經宿而授政知之真即用之當也今一旦促柱

自明以來  
倡期令其各舉其美求物色之功已不能如古人周至重  
以近日習成舉論人才故套每一人倡即十人和使倡之  
果必得其真則和之亦不妨于多然其人亦有偶係傳聞  
原無的見且容有夾雜意見不本至公其十人漫以羣和  
成之欲吏部即據名登籍曰某某賢某某才異時九卿督  
撫陞除惟取足于是外此者不復索錄此大亂之道也如  
近日巡撫鄖陽右僉都御史孫應鰲舉境內人才而原任  
南京刑部右侍郎何遷亦在所舉夫以遷之黨依權姦貪  
黷賄賂江西巡撫殊已盡喪平生末路經營不復更知廉  
恥乃今奉身歸里得脫堯舜之誅亦云至幸而鰲猶以境

內人才舉之不知在贅意見其將謂何茲若不預為申飭  
謂舉主無復如贅而所舉無復如遷臣不敢信古人治財  
卓有良法宋臣司馬光有言天地所生財貨百物止有此  
數不在民則在官譬如雨澤夏澍則秋旱不加賦而上用  
足此桑弘羊之所以欺武帝也臣嘗誦其言以為千古明  
白至論今日財用即周官法度無補今之治財雖桑弘羊  
孔僅劉晏陳京趙贊之徒亦不能生今之財蓋國儲既  
虛民力亦竭今言理財者謂但在節財不在生財夫謂在  
節財是矣但為節財之議者皆開端而不竟其說指節財  
之事者皆畧大而獨苛于細且不經孟浪之談復比比而

有如先帝丙辰中詔求足財之道于時尚書吳鵬都御史鄧懋卿各以裁減舉人坊牌及驛遞鋪陳船隻馬廐頭匹銀兩之議獻致後于舉人銀兩或許囑說入學童生以所得補所減之數而士習壞或為加增長夫水手以設處避原額之名而民病滋此人所共知臣不暇細論至于驛遞諸差民既以血汗包陪爰役乃復週年按限追徵其額設銀數減半還官臣向知高平時嘗追徵以等前件親見其顛連情狀雖極痛心酸鼻臨之竟坐視其蕩田廢業妻子而不能救茲若不預為申預謂不有如鵬如懋卿之議後出臣亦不敢信臣又惟今之事勢語用人如博利者

急求明珠若一誤認燕石為明珠則明珠無再至之理語  
理財如治贏者必遠鳥喙石一誤千參苓雜鳥喙則參苓  
無再奏之功使用一人而不能為朝廷光重擅圉干城  
顧使無似之人先以敗類用一策而未及濟遽儲匱竭

內帑空乏顧使不經之說先以戕民然則落落難羈之士  
可使若人之更敗而嗷嗷待斃之民能禁斯言之再誤耶  
臣是以不勝隱憂過計故今日明發入朝一聞明詔  
敢即急皇中以此愚昧無知之見預陳君父之前伏乞  
天語叮嚀勅下吏部再加詳議要覓遷之為人果是何  
品彙再乞勅下戶部亦加詳議要覓昔之獻議果曾否



病民果臣言不謬宜即將臣疏備細通行原擬應該獻  
議諸臣務要各出已見一本至公于用人則以如鰲如遷  
之事為懲戒但取其才勿拘方類即以一人舉十數人不  
為多合數才人舉一人不為少于理財則以如鵬如卿之  
議為懲戒但求大段勿事苛屑事可必行則嫌怨非所更  
計法可通變則今昔不必盡同以共求上合 天意仰副  
君心俯切民瘼則時事得因是以為推移 朝廷亦借是  
以為休美不則一番舉動竟屬空談後有施為人亦不信  
臣竊為 朝廷恥之其所不傾心罄力以共保斯言者誠  
亦無所逃罪臣備數諫垣亦當與議若惟圖隨眾塞責即

于臣亦甚便然臣必為此說者以一念犬馬耿切之心終不敢惟忍圖自便而不為國體惜也伏惟皇上裁察施行幸甚